

Siukang er a Belau

Lulluches er ngii

A

Masaharu A. Tmodrnag

Rengulbai Ngeburch

OMESODEL TIA EL BABIER

Tia el hong a ua longeru el bliongel er se el hong el mlotobed er a uche el ngklel a **CUSTOMER A BELAU**. Tia el hong a di ua se el kot el mlotobed e ng di ngar er ngii a bebil er a tekoi el mlo soiseb er a chesel el rullii el mo telkib el ungil.

Ng dirk ua lucheel omesubel a klechad er a Belau. A lsekum ngar er ngii a cheleuid er ngii me a lechub el ko er a mo rrau a rengmiu er ngii e ak kmal lolengit er kemiu a remenguiu er tia el hong me be msbedak me dekaingeseu el rullii el mo ungil. Ng kmal ungil a renguk el ngmai a ngeso er kemiu me dekaingeseu el rullii tia el hong el mo ungil el mo kirir a rengeleked.

Tia el hong a lluches el oltirakl er a llechul a omelecheselel a tekoi er a Belau el miltib er a chelechad el Orthography Committee er se er a July 1972.

OMERENG EL SAUL

Ng somam, kemam el milruul er tia el hong el Rengulbai Ngeburch, me a Masaharu A. Tmodrang el nguu tia el techall e mereng a sulir tirka el chad el ngilsukemam el meruul er tia el hong. Tirka el chad a ullengeseu er kemam er a omesodel a bebil er a tekoi el mlo diak kimodengei. Te kmal mlo mesaul er a ungil reng er tir me a ungil klaingeseu er tir me a uchul e tia el hong a mlo sebechel motobed. Aki kmal mui el mereng a sulir. Aika kid a ngklir tirke el chad el kmal mlo mesaul el lolengeseu er kemam. A lengar er ngii a mlechoit a ngklel e aki dirrek el kmal mereng a sulel.

Ibedul, Ngoriakl	Ngiraiobei, Rehuher
Ngiratulemau, Iyar	Iechaderechemai, Sumang
Bilung, Ngerdokoch	Rebelkuul, Demei
Obak, Erungel	Dirrengermeu, Ukong
Ngiraklang, Malsol	Sumech, Metauii
Talobak, Thomas	Rechucher, Salii
Tkedesau, Mad	Reklai, Lomisang
Spis, Sochai	Dirradai, Merii
Madrengbuked, Ngirturong	Dirrangilengii, Obkal
Ucherbelau, Siou	Ngirakebou, Demei
Oukerdeu, Waikasang	Espangel, Esebei
Blitang, Uong	Obakeriong, Imeong
Rechuldak ra tang, Adelbai	Ngiraibiochel Ucherbelau

A kmal klou el omereng el saul a mo er a Rengulbai Ngeburch el ngii a kmal mle uchul e tia el hong a mlo sebechel el tuobed. Ngika el rubak a ullisechakl er a Palau High School el mle ta era kmal mle ngar er bab el ungil el sensei. Aki kmal uluukerbai er ngii er a betok el omesodel a tekoi er a Belau. A sulel a diak el sebecham el lmuches me a ka el sebecham el kokad me ng di mo seluk er a chesel a rengmam, kemam el sensei me a rengalek er a skuul el mo er a ulebongel er kemam.

Masaharu A. Tmodrang

Kot el Bliongel

Beluu er a Belau

BELAU

A Belau a ta er a iungs er a chelsel a Micronesia. Ng betok el iungs el mo dmak e okedongall el kmo Belau. Aika el iungs a kot el mo bedul Ngebard er a iungs er a Micronesia. A klungel a Belau 190 square miles. A kot el klou el iungs er a Belau a Babeldaob; a ongerung a Beliliou; ongedei a Oreor; ongeuang a Ngeaur; ongeim a Sonsorol, e ng mo Ngcheangel, Meriil, Puluana; e a kot el kekerei a Hatahobei.

A Belau a blii el eru el bliongel. Ng ngar er ngii a Desbedall, me a Kiukl. A Reklai a ua lorreder er a Desbedall me a Ibedul a ua lorreder er a Kiukl.

Aika kid a beluu er a Belau el blii el Desbedall me a Kiukl. Ng dirrek lousbech a beches ngklel me a mechut el ngklel.

Aika el beluu er a Belau a ngar er ngii a mekekere el beluu el ngar er a chelsel doleker el kmo rengedel se el beluu. Aika kid aike el beluu er a Desbedall me a ike el mekekere el rengedel.

DESBEDALL

Beches el Ngaki

1. Ngcheangel
2. Ngerchelong
3. Ngaraard
4. Ngiwal
5. Melekeok
6. Ngchesar

Mechut el Ngaki

1. Ngedebuul
2. Rteluul
3. Kerradel
4. Kiueluul
5. Ngetelngal
6. Oldiais

KIUKL

Beches el ngaki

1. Ngardmau
2. Ngeremlengui
3. Ngetpang
4. Imeliik
5. Irrai
6. Oreor
7. Beliliou
8. Ngeaur
9. Sonsorol
10. Hatahobei
11. Merir
12. Puloanna

Mechut el Ngaki

1. Ongedechuul
2. Imeungs
3. Ngerdubech
4. Ngerbungsa
5. Bias
6. Ernguul
7. Odesangel
8. Edeaur
9. Sungesol
10. Techobei
11. Meriil
12. Bul

DESBEDALL

Aika kid aike el beluu er a Desbedall me a rengedel

<u>Ngklel a beluu</u>	<u>Ngklel a merreder</u>	<u>Ngklel a beluu</u>	<u>Ngklel a merreder</u>
1. Ngcheangel	Rdechor	2. Ngerchelong	Uorechetei
a. Ngerdilong	Obakerusong	a. Ngebei	Ngiraurreked
b. Ngerdimes	Rdechor	b. Ngerbau	Obak er Ngerbau
		c. Ollei	Tet
3. Ngaraard	Madrengebuked	d. Iebukel	Obak er a Iebukel
a. Ulimang	Beches	e. Ngermetong	Riungel
b. Elab	Ngirarois	f. Ngriiil	Iechad ra Butelbai
c. Ngebuked	Madrengebuked	g. Mengellang	
d. Ngkeklau	Rechebal		
e. Chol	Ngirameketii	4 Ngiwal	Uoruos
5. Melekeok	Reklai	a. Ngercheluuk	Ngiringesechei
a. Ngeburch	Ngetibuchel	b. Ngermechau	
b. Ngeruliang	Ngirakumer		
c. Ngermelech		6. Ngchesar	Ngirakebou
d. Ngerang	Iobech	a. Ngeruikl	Techetbos
e. Ngerubesang	Ngiraingas	b. Ngeraus	Desengang
		c. Ngchesar	Ngirakebou
		d. Ngerkesou	Ngiracheruang
		e. Ngerngesang	Ngirchoiremech
		f. Ngersuul	Obakermechuu

KIUKL

Aikakid aike el kuk beluu er a Kiukl me a rengedel

<u>Ngklel a beluu</u>	<u>Ngklel a merreder</u>	<u>Ngklel a beluu</u>	<u>Ngklel a merreder</u>
1. Ngardmau a. Urdmau b. Ngerutoi c. Ngetbong	Beouch Arbedul ra Tebelak	2. Ngeremlengui a. Imeong b. Ngermetengel c. Ngerutechei d. Ngchemesed e. NgerekIngong	Ngirturong Ngirturong Ngiradilubech Ucherrutechei Beches Secharkebur
3. Ngetpang a. Mechebechubel b. Ngetpang	Rekemesik	4. Imeliik a. Medorm b. Ngchemiangel c. Elechui d. Ngerkeai e. Imul	Rengulbai Uchel Melachelbeluu Rebluud Secharraimul
5. Irrai a. Ngchesechang b. Oikull c. Ordomei d. Ngerusar e. Ngeruluobel f. Ngetkib	Ngiraked Spis Ngirachitei Ngiraked Tuchermel lechaderteluang Techedib	6. Oreor a. Ngermid b. Ngerkesoaol c. Ngerchemai d. Iebukel e. Ngermenganged f. Ngerbeched g. Ngekebesang h. Miungs	Ibedul Remeliik Adelbairekesoaol lechaderchemai Rdulaol lechadribukel Espangel Uchel
7. Beliliou a. Ngesias b. Ngerdelolek c. Ngerkeiukl d. Ngerchol e. Teliu Beches el beluu f. Klouklubed g. Uosech h. Imelchol	Obak Uchelsias Aderkeroi Obaklchol	8. Ngeaur a. Ngerbelau b. Ngermasech c. Rois	Ucherbelau Ucherremasech Ucherkemur

OMOACHEL ME A ROIS

A Belau a dirrek el ngar er ngii a meklou el omochelel. Aika el omoachel a ngar er ngii er a derta el beluu er a Belau. Ng diak ledi lengar er ngii er a rokui el beluu. Aika kid a omoachel er a Belau me aike el beluu el lengar er ngii.

Ngklel a omoachel

1. Ngerdorech
2. Ngermeskang
3. Tabecheding
4. Ngerbekuu
5. Ngerikiil
6. Ngertebechel
7. Ngchemiangel

Beluu el lengar er ngii

Ngersuul, Ngchesar
 Ngeremlengui
 Ngetpang
 Ngiwal
 Irrai
 Ngardmau
 Imeliik

A Belau a di ta el beluu er a Micronesia el ngar er ngii a klou el diong er ngii. Tia el diong a ngar er a Melekeok. A ngklel a **Ngardok**.

Se el domes er a Belau e ng betok mekididai er ngii. Aika el mekididai a doleker el kmo **rois**. Ng ngar er ngii a kleai el mekididai el rois er a Belau. Aika kid a ngklel a rois er a Belau me aike el beluu el lengar er ngii.

Ngklel a rois

Ngerchelechuus
 Etiruir
 Ngeruach
 Ngulitel
 Roisersuul
 Roisechesar
 Ngedech
 Ngerbekebukel

Beluu el lengar er ngii

Ngardmau (713 ft.) (Ngeremlengui)
 Ngeremlengui
 Ngeremlengui
 Ngkeklau, Ngaraard
 Ngersuul, Ngchesar
 Ngchesar
 Ollei, Ngerchelong
 Irrai

Chutem er a Belau

A chutem er a Belau a ngar er ngii a ede el bedengel. Ngar er ngii a chelechol, chutem el dousbech el meruul a bekai, olekall, me a olbidel (clay), me a di chutem el dolalem a dellomel er ngii. Aika el chutem a mechedelekelek el ua mesei me a kuk cheriich e ng di sebechel dubech a dellomel me a kerrekar er ngii.

Klalo el mengai er a chutem me a daob (natural resources)

Ringko Me A Chidudes. A Belau a ta er a iungs er a Micronesia el ngar er ngii a klalo el mengai er a chetemel. Ng ngar er ngii a Ringko (phosphate) me a Chidudes (bauxite). A ringko a dechil a suebek el charm el meketeketa el medechel er a chelsel a chutem. Aika lulengiis a rechad er a Dois me a Siabal e meruul el mo ramek (koyas). A ringko debetik er a Ngeaur me a Beliliou. Ng dirrek el ngar er ngii a kuk bebil er a klalo el mengai er a chutem e ng di diak lsa betok me ng diak kbo kusaod er tia el babier. A ringko a lulengiis a rechad er a Siabal el mo lmuut er a 1954 e ngii a mlo diak longiis. A chidudes (bauxite) a debetik er a Ngardmau me a Ngeremlengui. Aika di lullai a rechad er a Siabal mlo meruul el mo ta er a bedengel a deel. Te di millai er se el taem er a Siabal e se er a bo lemerek a mekemad e ng mlo diak lolai.

Ngikel Me A Kai. Aike el kuk mengai er a daob el klalo a ngikel me a kai. A ngikel a dolai el mo odoim me a mo kanzume. Aike ngikel el mo kanzume a tekuu (katsuo,tuna). A ngikel er a kereker me a kuk di ngodech el meklou el ngikel a di dolai el mo odoim. A kai a lolai a renebard el mo bechiich me a dirrek el meruul el mo bek el bedengel a klalo. A kot el klou a belkul el sebechel el mo uchul kerrekerngir a rechad el kai a semum. Ngar er ngii a taem e ng mo subed el rechad er a Belau a mo meruu a semum el mo olterau. Ng diak di ngii di el taem el sebechir a rechad el meruu a semum el lolterau.

Dellomel. A Belau a ngar er ngii a bek el bedengel a dellomel er ngii. Ng ngar er ngii a dellomel el kall a techel el ua diokan, brak, kukau, chemutii me a telngot. Ng dirrek el ngar er ngii a dellomel el kuk kall a redechel. Aika el dellomel a ngar er ngii a tuu, bobai, meduu, lius, ongolngebard, sausab, chedebachel, rebotel, me a kuk bebil er a dellomel el kall a redechel. A Belau a ngar er ngii a betok el bedengel a kerrekar el dubech er ngii. Ng ngar er ngii a meklou el kerrekar el sebeched el ousbech el meruul el

mo mlai me a mo blai. A dort a ta er a kmal mesisiich el kerrekar el dousbech el meruul a blai. A meduu me a btaches a lulusbech a rechad er a irechad el meruul a mlai. A chereomel a mui er a betok el bedengel a kerrekar el dousbech el meruul a blai me a bebil a kuk di kelel a charm a redechel.

ONGERU EL BLIONGEL

*****||*****

UCHELEL BELAU

ME A KLENGAR ER A BELAU

CHELDECHEDUCH EL CHELID EL MESAOD ER A UCHELEL A BELAU

A Kim el mla er a Lukes el delongel el a Beliliou me a Ngeaur a milechellii a Latmikaik. Ngika el Latmikaik a milechellii a Uchererak el sechal me a Uab el dirrek el sechal me a Iluochel el redil. A Uchererak a mlo Uchelianged. A Uab a mlo metongakl el chad me te dmul a ochil me ng muukel el me beluu er a Belau. Me a Kiukl a mlo delel me a Desbedall a ulkel. Tia ikid a ua luchul e a chelmoll er a Kiukl a cheroid e a chelemoll er a Desbedall a kmeed. A Rrenged a ua leblo lechikl el e a Ngerchelong a btelul, ise a uchul me ng Euidrechelong.

A Iluochel er a lengar er a Ngeaur e ng mle Dililebuu a ngklel e me er a Ngeriab er a Beliliou me ng mlo Dilidechuu e mlo er a Ngibtal er a Ngiwal me ng mlo Dirrachedebsungel (mesa Meduuribtal) e mlo er a Ngerchebukl er a Ngchesechang me ng mlo Dirrabkau.

Ngika el Dirrabkau a dimlak a ngelekel. A ta er a klebesei e ng mlo omus a such e metik er a ngais, me ng kildmeklii e nguu el me er a blil me ng medechel el leko ngodimel. Ngika el mechas a ulebes er tia el ngais me ng medechel el mlo meketeket. Tia el ngais a ulemeu el ngalek el sechal me ngika el mechas a milengklii el Ngiselacheos.

Tia ikid er a lengar er a Ngechebukl e a rechad er a Ngerchebukl mlo melai er a redil er a eanged e metom el dimlak a lenguu me te ngmai a buuk e mechit a medal a Temedokl el mengkar er a siseball er a Eanged. Tia a mlo uchul e a rechad er a eanged a di diak lodengelterir a rechad e te me soiseb er a eanged. Tirka el chad er a eanged a mlo ko er a rrau a rengrir e a lebo lesa Temedokl e ng diak a medal. Te ngoura a cheluchouch e merema osiik a medal a Temedokl. A le kirel a Ulechong e ng obuu a cheluchouch me te mocha medenge el kmo a remlo er a delengerenger a ngar er tia me te mocha er a Ngechebukl. Te miltik er a rechad el mla er a che me te ullengit a odimir. A lomes er a blil a Dirrabkau a ngar er ngii a chat er ngii me te ngmai a odimir el ngikel el lullengit er a remla er a che el mo e dmul er ngii el mechas el kmo, “Chedil mdul aika el odimam me a kime e kimngai.” Te merael e ngika el mechas a merakl a kukau e tmiud e ngmai aika el ngikel el locha er a chesl e mekesiu e smaur e smuk er a oruikl e mechei. E tir a kuk merema tirka el chad er a eanged me ng ngmai el mesterir. Te ngmai e merael el mocha er a melengel a rael e mocha omengur. A bo lekedekedii a oruik e ng di

kukau e diak a ngikel me ng kmal ngilasech a rengrir. E a bo lekedoked a kukau e a ngikel a ngar er a chelsel el kmal ungil mark me ng ungia a rengrir. Te mlo merek el omengur e lueta el mo subedii a Dirrabkau el kmo, “A lemei a ngelekem er a Ngiselacheos e ke dmu er ngii me ng mo soktii a olechutel e le ng mo er ngii a ieleb el blals e le rechad er a Ngerchebukl a ngilai a medal a Temedokl. A lebo er ngii a ieleb e kau me a ngelekem a mo er a olechutel me ng diak komad.” A lemerema a Ngiselacheos e a delal a dilu er ngii me ng soktii a olechutel. Tia er a lebo lemerek a olechutel e ngii a mlo er ngii a ieleb me ngika el mechas me a ngelekel er a Ngiselacheos a mla er a olechutel el mo er a Ngeruach el rois er a Ngeremlengui e ng mocha cheraches me ng metongakl er tia el rois. Tia er a lebe metongakl er a rois e ngika el mechas a mlad. A rechelid a mle metengel e metik er ngii me te rullii el Imuut el me chad. Tia ikid a uchul e ng mlochu Milad a ngklel.

A Milad a mlo omechell me ng milechellii a Imiungs me a Melekeok me a Imeliik me a Oreor. A Ngebei er a Ngerchelong rechedel a Milad. A Imeliik a mle redil e tirke el tede a mle sechal. A Ngerkeai er a Imeliik a mechellii a Ngercheluuk er a Ngiwal. A Ngeremlengui a ketengel a Milad me ng di uleba e a Melekeok a kmal mle tekeok me ng dilebekii el mlo cheroid e a Imeliik a redil me ng di milechere er a bita er ngii. A Oreor a kmal mle sureor me ng dirrek el dilebekii el mo cheroid.

Tia el taem e te mla er ngii a rengelekel a Uab me a rengelekel a Lild me aike el beluu el mla er a eanged el mei. Aike el beluu el ngelekel a Uab a Ngerchol er a Beliliou me a Ngermid er a Oreor me a Ngerusar er a Irrai me a Imul er a Imeliik me a Ngersuul er a Ngchesar me a Ngeruikl er a Ngchesar me a Ngellau er a Ngiwal me a Ulimang er a Ngaraard. Aika kid el kleai el beluu a ngelekel a Uab.

A rengelekel a Lild a Chelab er a Ngeraard me Ngchesar me a Irrai. Tia el Lild a mla er a Ngeremengelong er a Chelab.

A beluu el mla er a eanged el me a Ngersois er a Ngetpang me a Ngesebei er a Ngardmau me a Ngetmel er a Ngerchelong me a Ngerames er a Melekeok.

A Ngersois me a Ngesebei me a Ngetmel a leko ng ngar er ngii a bad el kerreel el ua ekil el leko aika a lullab a rechelid el olimoim aika el beluu el me er eou. A Ngerames er a Melekeok a leko a chad er a eanged a rirames me ng ruebet el me er eou.

Blingeel a beluu er a Belau er a Irechar**Bilta el Eanged**

1. Oreor
2. Ngeremlengui
3. Ngebuked

4. Mengellang
5. Beliliou
6. Ngeaur

Bitu el Eanged

1. Melekeok
2. Ngersuul
3. Ngiwal
4. Chelab

5. Desbedallechelong
6. Ngardmau
7. Ngcheangel

Aike el beluu el di mla er a delongeel

1. Irrai
2. Ngetpang
3. Ollei

4. Imeliik
5. Chol
6. Ngkeklau

Blingeel a Beluu er a Belau er a chelecha el taem**Ngklel a beluu**

1. Oreor
2. Irrai
3. Ngeremlengui
4. Imeliik
5. Ngetbang
6. Ngardmau
7. Beliliou
8. Ngeaur

Bitu el Eanged**Ngklir a remerreder**

- Ibedul
Ngiraked
Ngirturong
Rengulbai
Rekemesik
Beouch
Obak
Ucherbelau

Bitu el Eanged

1. Ngcheangel
2. Ngerchelong
3. Ngaraard
4. Ngiwal
5. Melekeok
6. Ngchesar

- Rdechur
Uorechetei
Madrangebuked
Uoruos
Reklai
Ngirakebou

SKEL A CHEBECHIIL ER A IRECHAR

A irechar e a bo el soad el mo bechiil e kede mo katekoi kid me a redil el soad el mo bechil e didu el mo mesubed er a redemad me a redelad. A lechetirir a ngii di el bita e ng diak el sebeched el mo kaubuch. E le chedam me a chedil a osiik er a ungil el rasech el ngii a mo bechil a ngelekir. A lsekum me ng ungil er tir el erebita e kede mocha sebeched el mo kaubuch. A bo dekaubuch e a sechal a mo tmuu er a blil ngike el redil el bo lebechil. Se el lebo ltuu er a blil a redil e ng mo nguu a klou el chad el meduch el mo olsisebeb er ngii er a blai. Tia a belkul a mo kesai a chelsa er se el blai me ng mo diak lsa el mengoit a udoud e le ng mla mo chesmachel er se el blai. A irechar e ng dimlak a merengel a chebechiil. Ng dimlak a klou el ungil klebesei se el lebo lebechiil a rechad.

Ise ikid e ng mocha chebechiil me te ngar er a blil a redil e a demal a redil a remuul a kall el ngederel a ngelekel e mo ngoderterir er a blil a sechal. Se el loruul aika el kall el ngederel a ngelekir e ng ngar er ngii a meduch el melemosem a telechull el mo melemosem aika el telechull. E le lsekum me ng ungil a semesemel a telechull e a udoud a mereched el me soisebeb er a demal a redil.

Se el lebo lemengader ngika el redil e ngii a mocha **buchelsechal** er a blil ngika el sechal. Me ng ngar er a blil a sechal el mo meketeket e a demal a sechal a mochu melecha er a ongraol er ngika el demal a redil. A demal a redil a remuul a kall el ngederel a delobech e ngmai a kall me a delobech el mo msa demal a sechal. Tia el delobech el lebo lolai er ngii a ongraol el kirel el orul ngika el ngeleked el sechal e le tirka el teru el kaubuch a didu el sorir el kaubuch. E a chimo el kluk a ouerukem a teblo el delobech me se el ongraol el dolai er ngii a orul a sechal e se el medechel a orul a redil. Ise e a demal a sechal a mochu melecha er a orul a ngelekel el kluk. A lebo lolecha er a orul a ngelekel e a demal a redil a remuul a betok el kall el kelir a remle melecha er a orau. Chelecha el taem e a ongraol a mla mo diak. E ng di orau a dirk ngar er ngii. A kluk el udoud er a Belau a kmal mla mo mekesai e di kesai el chad olab. Me a orau er a chelecha el taem a oumesingd el di udoud er a Merikel me a lechub e ng udoud er a Merikel me a kluk.

A urrerel a sechal el kirel a redil a belduchel me a utiichetet me a ukerael me a omesiungel a delengcheklir. Se el lebo lomechar a demal a bechid e kede mo melecha a beldechelel a bechid e a bo lomechar a oktemelel a bechid e a ledu er kid a demal a

bechid el kmo ko mo omelduchel e kede mo e a lak e ng diak. Se el lebo er a ocheraol a demal a bechid e kede mo ometiich er a til. Se el lemad a chad er a blil a bechid e kede mo osiik er a ukorolel a bechid.

A ukerael, tirke el redil er se el blai el mlad a chad er ngii a rokui el mo omekerael el merous aike el ukorolir el ulsiik a rebecherir el merous er tirke el redil el ngar er a kemeldiil el rokui.

Ngika el redil a lsekum me ng ungil el bechiil e ng mo sebechel el nguu a merengel. A mur a kot el ngar er a bab el omeruul er a chebechiil er kid a rechad er a Belau er a irechar me ng kesai el redil el kmal el ungil el bechiil a ngmai a merengir er a rebecherir. Tia ikid a roel a kekere el chad me a kekere el redil a lebo el kaubuch.

A rubak a bo lebechiil me bo ltuu er a blil a mechas el mo bechiil e ng omoket er a udoud el kldait el bsengel e mo bechiil. A omeruul er a uriur er a chelebechiilir a di ua omeruul er a chebechiil er a remekere el chad. E ng di ngklel a rubak er se el blil a bechil a **uadam**, ng diak el chesmachel el ua remekere el chad.

ROLEL A KLDIULL EL MO LMUUT ER A CHEROLL

Se el debo dodengeli a redil el kmo ng dioll er a keketengel, e ng mo chelsimer. A uchul e ng mo chelsimer a meruul er a delal a ngalek me lak lorael el mes a betok el delengerenger me lebo lechelutel a ngalek el ngar er a delel. A demal a redil el dioll a mo mak a kerreomel er a bek el bedengel a kall el kelel ngika el dioll. A kerreomel a ngerachel el lenguu a demal a redil el dioll el msa ta er a chad el mo oungerachel er ngii el osiik a kall. Ng ngar er ngii a kerreomel er a ngikel, me a kerreomel er a belochel me a dirrek a kerreomel er a kuk di bebil er a kall. A uchul e kede omak a kerreomel a kldiull er a irechar a beluu el kodall, me a ta, a meruul er a dioll me lak lengibes a kall e le ng mo ngemokel a ngelekel a lemechell.

A ede el bilel a redil e a okdemelel a redil a mo kobsii a udoud er a chiklel el omebael. Tia el omebael a belkul a meruul er a ngalek el ngar er a diil el kmo, lebeob el mo cherrungel el chad el diak lultechei.

A elolem el bilel e ng mo er ngii a buildiil. Se ikid e a rechedal a sechal a mo olab a udoud el mo er a blil ngika el dioll. Aika el udoud a klouang: **1.** Ngar er ngii a Kluk el

mo buuldiil. Tia kirel el omuu er a delel a dioll; **2.** Ng dirrek el ngar er ngii a Kldait el mo osumechulitech. Tia belkul a kmo, se el lebo el belsechel a cheroll me lobuu a bedakl e lak lechetituokel a ngalek el me tuobed. **3.** Ngar er ngii a eru el kldait el dik er a bitang me a bitang. Aika el udoud a melik er a ngalek er a chelsel a diil me lak lomteuitech me lebo lulterkokl a rengul a ngalek a lemechell. Aika el udoud a lomoket a rechedal a sechal el lebo losuk a okdemelel me a rukdemaol er a blil ngika el dioll el redil.

A dioll er a ketengel el redil a delsongel beluu me a bngel a delel a ulterkokl el mo er a okdemelel. A belkul a delsongel beluu, a irechar e a redil se el lebo el belsechel a cheroll e a ruurrot er se el blai a mo nguu a lild el mo desengii a delel a dioll e otebedii a ngalek. (*a cheldechedechal a Mengidabrukoel a smodii tiang*). Me a belkul a delsongel el beluu, a dioll er a ketengel el redil a mo er a se el kmal belual me a blil e te dosengii a delel e otebedii a ngelekel.

A REDIL EL MLECHELL ER A KETENGE

A redil el mlechell er a ketengel a mo measurech. A omesurech er a mlechell er a ketengel a ukeruul el mo er a bedengel a mlechell el redil e dirrek el meruul er a bul a bedengel a redil el mo ungil. Ise a uchul e te osiik aike el ungil a bul el emull el mo er a osurech. A ildisel a sils el lebo losurech a mlechell a oltirakl a ildisel a sils er se el blil. A bek el kebliil a kakerous a ildisel a sils el losurech er ngii. Se el lebo losurech ngika el mlechell e te osiik er ngike el meduch el measurech me ng mo measurech er a mlechell me ng mo mesisiich a bedengel e ungil a bul. A bo el merek a omesurech e a rechedal a redil a mo msa udoud me a toluk el omeksullel a measurech.

Se el lebo er ngii a omesurech e ng ruoll a kekere el blai el lebo er ngii a mlechell e measurech e diak di lecholt er a rebetok el chad e le ng ngar er ngii a teletael el loltirakl er ngii a measurech. Se el lebo er a ulebongel er a omesurech e ng mo er ngii a omengat. A omengat a orokiolel a omesurech me te mengat er a mlechell el meruul er ngii me a lebo er a sils e ng diak lebo lechetelaol, me a ta a meruul er a bul ngika el mlechell el mo ungil.

Se el lebocha er ngii a omengat e ng meruul a bliukel el lebo el tuu er ngii a mekeald el kar. Tia el bliukel a lerellii me ng diak a chat el tuobed er ngii. Tia ikid e te nguu a

mlechell el otungii er a chysel e osiseb aike el ungil a bul el kar er a chysel el mo meruul er a mlechell el mo ungil a bul a bedengel. Ng di ngike el kmal chedal a mlechell el redil a obengkel ngika el mlechell el ngar er a chysel a bliukel el oba belsechel e ng mengai a bliukel.

Ngar er ngii a eru el bedengel a omengat. A lsekum a redil a bechiil e ng mo er ngii a omengat el mera el omengat e a lsekum me ng mesobil e ng di omengat el ralm.

A lsekum me ng di omengat el ralm e a rechedal a sechal a di olab a klokkel ngika el ngalek el mo er a blil ngika el mlechell el redil e a mlechell a diak lebo letobed. Tia ikid a mle rokel a omengat er a irechar.

Se el lemera el omengat e a demal a sechal a mo mengabs er a udoud er a chikl el mlechell el dekedekel a chiukl el belkul a kmo, a demal a ngar er ngii a ududel el sebechel el mo er a ngekel a lebo lekedung. A rechedal a sechal me a redil a didu el mo er a omengat e le tia a klou el deureng e le ng mla me ta er a chad me a delal a ngalek me ng mesisiich a bedengel. Ise a uchul e ng mo tuobed a mlechell e te omes er ngii a rebetok el chad e meloik el dmeu a rengrir.

Chelecha el taem e a lsekum me ng mera el omengat e a rechedal a sechal a olab a klalo me a udoud el mo er a blil ngika el mlechell. Aika el udoud a doleker el kmo ng sengk er a ngalek. A sengk er a chelecha el bla bo lak a buuldiil a lebebil er a taem e ng mesuk a demal a mlechell e a lebebil e ng mesuk a okdemelel ngika el mlechell. A omengat el ralm a di osisiu. E ng di chelecha e a redil a di sebechel el mesobil e a lemechell e ng mo tuobed. E ng di te di chedal ngika el redil a di tir el mo mengabs er a dekedekel a chiukl.

KODELLIR A REDI CHAD

Se el lemad a chad e ng mo er ngii a subed er a kodall. Ngike el kmal chedal a mlad el chad a kirel mesubed er a rechad. A rechad el sbadel a retelungalek me a rechad er a kebeliil me a klebliil er a demal me a delal a mlad. A merreder er a keblillel a delal a mlad a blechoel el oltobed er a subed.

A lemad a chad er a irechar e ng kired el melocholb er ngii. Ng di ngike el redil el kmal chedal a mlad a melocholb er ngii. E le bebil er a taem e a mlad el chad a mengemochem me a lechub e ng chemei. Se a uchul e ng di ngike el kmal chedal a chad a melecholb er ngii. A redil er a obliil me a lechub a bechil a mlad a diak el sebechel el melecholb er a mlad e leng mo uchul a mekngit el chais el me er kid. A mlad a kired el tochelbii er a uche er a bo lekloi er a bluuldang e le rechad a mekngit a rengrir me ng sorir el mo omes er a mlad e lmangel me a rebebil a lmangel el mo melungel er a medal a mlad.

Se el dekedmeklii ngika el mlad el chad el mo ungil e ng mo kloii er a bluuldang er a blai, e ngii a mocha subed el lebo lomes er ngii a rechad. A bluuldang a se el tuangel er a belngel a blai. Tirke el chedal a mlad a ngar er a sar. A sar a sar er a iars. Se el lemad a chad me lebo lekloi er a bluuldang er a blai e te merekii a iars er a mlai er se el tuangel er a bluuldang me ng diak a deribek me a lechub a dichel a sils el mo er a mlad el chad. Tirke el mechas el liliuekl er a mlad a dengchokl er a eungel a sar er a iars. Se a uchul me te ngar er a sar.

A lsekum a mlad el chad a sechal e ng ngar er ngii a lild el usirs er a kboub el cheleolel a mlad. Tia el lild el cheleolel ngike el sechal el mlad a belkul a orrekim a merreder er a did el loki ngii a remlad el mo imuul er a belurir a redeleb. se el lebo delebengel a sechal e ng nguu se el cheleolel el lild el lorrael el mo imuul er a did. A lsekum a mlad a redil e bechiil e a rechedal a bechil a mo melecha dillel. A lemesobil e te di rengalek el redil me a remechas er se el blai a mo omoket a dillel me te smuk a rukdemaol er se el blai. Aika kid el dillel a redil el udoud se el lebo a delebengel a redil er a eanged e ng ngmai aika el udoud el msa a orrekim el cheral a did e mo imuul.

Chelecha e a mlad el chad a kloii er a bluuldang e a remechas el ngar er a chelsel a blai a mengelleloi. A omerous el ukerael a ngar er ngii. Aika el ukerael a kall me a lechub e ng ilaot el lusiik tirke el becherir a redil er se el blai el mlad a chad er ngii.

Aika ikid el ukerael a lolab tirke el redil er se el blai el merous er tirke el ngar er a kemeldiil el redil el rokui e a resechal a diak lebo er tir a ukerael.

A lsekum a chad el mlad a telechull er a dui e ng siokel a teru el meduch el melai a dui el chad. Se el lechelngii a beldokel el mo dechor er a odesongel e a ta er tirke el meduch el melai er a dui a nguu se el dui el loba el mo tuuebokl er a eungel a beldokel el mo msa ngike el ta el ngar er a bluuldang e ng mochu medakl a beldokel.

Se el lebo lolakl er a chad e a lsekum a mlad el chad a klou a roel el mo er se el blai e ng mo medakl er a uchul a orengodel er a odesongel er se el blai. A lsekum me ng kekere a roel el mo er se el blai e ng mo medakl er a rsel orengodel. A irechar e ng dimlak a olekull me a remlad el chad a di mo medakl er a odesongel er a blai. A olekull a mlo er ngii er se el taem er a Siabal.

KLOMENGEIUNG

A klomengeiung a mo merek a omelakl e a bo el kukuk er a kebesengei e ng soiseb a klomengeiung. A remo mengeiung el redil tirke el meklou el redil el chedal a mlad el chad. Ngike el kot el klou er tirka el mengeiung a mo oba a bar. Ngike el oba bar a leko ng olab a chesengel a mlad me ngike ikid a mo kot el meoud el tuobed er tirke el mengeiung el rokui.

Se el lesiseb a klomengeiung e ng ede (3) el klebesei e tir a mo osiik a ungil bung e rullii a sis e a bo el klebesei e tir a mo olturk er a sis el osiik er a uchul a kodellel ngika el mlad. Tirke el mo mengedecheduch er a sis tirke el meklou el redil el chedal a chad el mlad el kauderta er tir el mo oba a sis e mo omasech aike el lomdasu e ng uchul a rakt el kirir. A lsekum a ta er tir a dillii se el uchul e ng mlad ngika el chad e a sis a mo meloik. E a lsekum ng dimlak ledelii a uchul a kodellel ngika el chad e ng diak lebo loloik a sis. A bo el tutau e te tuobed a rebebil er tirke el mengeiung el diak lesa el meklou a rolir el mo er ngika el mlad.

A omengades a etiu (9) el klebesei e ng omengades er a debellel ngika el mlad. A remo mengades el chad tirke el chedal ngika el chad el mlad. A lsekum a mlad a sechal e ngar er ngii a resechelil e sorir el mo mengades er a debellel ngika el mlad e te mong, e

kid a meruul a kelir. Se el bo lemerek a omengades e te tuobed a rebebil er tirke el mengeiung el mechas.

Chelecha e ng mo merek a omengades e ng euid (7) el klebesei e ng ballechad. Tia el ballechad a dirrek el tebedall er a remengeiung. A belkul a kmo a rengul a delebengel a mlad a dirk chemau a berul er a lechad.

Uriur er a ballechad e ng dirrek el euid (7) el klebesei e ng ballechelid. Tia dirrek el tebedall er a remengeiung. A belkul a kmo a rengul a delebengel a mlad a mla mo chemau a berul er a klechelid.

Uriur er a ballechelid e ng kuk euid (7) el klebesei e ng toudechad. Tia a dirrek el tebedall er a remengeiung. A belkul tia a rengul a delebengel a mlad a dirk teluchakl el bedul a klechad. A kot el uriur er a tebedall er a remengeiung a toudechelid. Tia a dirrek el euid (7) el klebesei er a uriur er a toudechad e ng mo er ngii a toudechelid. Tia a belkul a kmo, a rengul a delebengel a mlad el chad a mla touchakl el mo bedul a rechelid.

Ngike el oba a bar el mechas a tuobed er tia me a lechub e ngii di el ta er aika el edei el reuikl: ballechad, ballechelid, me a toudechad, a lsekum me ng di ngii ku el ta el mengeiung.

CHELDECHEDUCH ER A KODALL

Chelecha e ng mo merek a klomengeiung e ng mo er ngii a cheldech duch. A cheldech duch a lsekum a chad el mlad a bechiil e ng mo er ngii a cheldech duch. Ng di a lsekum me ng di mle mesobil e ng diak a cheldech duch. Me a lebocha er ngii a cheldech duch e ngike el chedal, a ldemal me a lechub e ng ngike el merreder er a keblillel a sechal a mesubed er a rechad er se el kebliil er a cheldech duch. Ng dirrek a okdemelel a sechal a mesubed er a rechederir me te me er a cheldech duch. A belsechel a cheldech duch a loba tirka el chedal a sechal. Ngika el chedal a sechal a mesubed er a rechedal el rokui er a belsechel a cheldech duch e te me kldibel e osiik er a remo kirel a oruikl. Me se el lebocha el lemoterkokl a idisel a oruikl e ngike el oungerachel er a cheldech duch a mesubed er a rechedal a redil el kmo ngtela el oruikl a ruoll. Chelecha a udoud el otebdadel a udoud el mo chelebechiil me a techel otungel me a techel a oruikl. A lsekum a mlad a redil e ng diak a techel a otungel, e ng di ngar er ngii a chelebechiil

me a techel a oruikl. E a lsekum me ng mlad a sechal e ng ngar er ngii el edei. Aika el techel a otungel me a techel oruikl el udoud a lebo lomokete a rechedal a sechal el mo er a rechedal a redil. Se el chelebechiil a ua ia lududel a ngalek e le chelebechiil me a ududel a ngalek a di mle ta er a irechar.

A rechedal a redil a ngerchelir er a cheldechoduch a meruul a kall. Me a okdemelel a redil a meruul a kelel a chelebechiil. E a rukdemaol er a blil a redil a meruul a kelel a oruikl. Me se el lebo losuk a udoud e a okdemelel a redil a mo mesuk er a chelebechiil e a rukdemaol er a blil a redil a mo mesuk a techel a oruikl. A omeruul el kall er a chelecha el taem a mla mo diak lsa el ulterkokl e le ng mla mo diak a oruikl, me ng dirrek el mla mo diak a techel a oruikl.

A udoud el bekatel er a chelecha el taem a ngar er ngii a ududel a ngalek me chelebechiil. A ududel a ngalek a bo losuk er ngii a okdemelel a ngalek e a chelebechiil a losuk er ngii a demal a redil.

KODELLIR A REMETEET

A lemad ngike el kot el rubak er a beluu e a remechas er se el blai a subedii ngike el ongeru el rubak me ng subedeterir tirke el rubak me te mo kldibel er se el birir e oderchii a chad el mo melebusech el euid (7) el olengemetel a rengul ngika el mlad el rubak e dirrek el mesubed er a beluu el rokir el kmo a rubak a medei. Tia a mle tekoi er a irechar er a le dirk lecheldull a beluu me a klobak a kmal dirk mle mesisiich.

Chelecha el taem e ng di ngike el kmal chedal a mlad a oltobed er a subed el mo er tirke el chad er a kebliil me a klebliil me a rubak er se el beluu me a rubekul Belau.

A blekeradel er a kemeldiil er a remeteet er a irechar a mle telkib el ngodech er a chelechang. Ng mle kuoll el diak a kmal cherrodech me a rechad mlengull a rokui el blekerdelel a kemeldiil. A bebil er a blekerdelel a kemeldiil a di osisiu ngii me a redi chad. Chelecha el taem e a kemeldilir a rubak a di kmeed el di kaisisiu ngii me a kemeldilir a redi chad.

Se el lebo el medakl ngika el rubak e a rubak er se el beluu a kldibel er se el birir e oldurech el mo oker er a ruurrot er se el blai er a mo sechelirir. A ruurrot a mo olisech er a mo omteche er ngika el mlad el rubak e a lsekum te dillii a sorir a rubak el ngar er a bai

e te kongei. E ng di lsekum me ng diak lsorir e ng diak lekenge el di mereko lebetik er a sorir e te kongei.

Se el sis e bo el tutau e te nguu se el sis el lulelturk er ngii, e ng mo er ngii a debusech e ng mengerd se el sis el taor. A lsekum me ng mle teruich el lolebusech e ng teruich (10) el klebesei el taor el diak a cherrodech er a beluu. A lsekum ngar er ngii a chad el mengerodech e a rubak a melsii ngike el chad. A lemad a ongeru (2) me a ongedei (3) me a ongeua (4) el rubak e ng di mo taor er aike el kebliil er tir el dirrek el teruich (10) el klebesei.

Se el bocha el moterkokl a rubak e ng ruoll a kerritakl. A kerritakl a loruul er ngii a okdemelel ngike el redil el bechil ngike el mo omtechei er ngika el mlad el rubak er se el beluu. A rubak er se el beluu a ngar er a bai e ngii a meruul a kelir tirka el rubak me a ruurrot er se el blai el teruich (10) el klebesei. A udoud el mo meruul er a kerritakl a lomoket er ngii a ta er a ruurrot er se el blai. A mo mesuk er a udoud er a kerritakl a okdemelel a bechil ngike el beches el mo rubak el ngii a meruul er a kerritakl. Tia el omeruul er a kerritakl a di omeruul se el lemad a Reklai er a Melekeok.

A beches el mo rubak a mo chelsimer el ta el (1) buil e ngike el ourrot er se el blai a olsisechakl er ngii er a kelulul a beluu.

Se el bo lemerek ngika el rubak el chelsimer me bo ltobed el mo er a bai e a ruurrot er se el blai a mo omoket a udoud el mo er ngii el belkul a kmo, ng mocha merreder er a beluu me ng mo diak longereker e le ng mo mechesa er a tekingel a beluu. Aika ikid el udoud a doleker el kmo techiau.

Se el lebo el chelsimer ngika el rubak e ng ngar er ngii ngike el kirel el oba el mo er se el bai er a rubak. Me a lebo e ng mo tmuu er a bai el mo dengchokl er a eungel a kleangel. E tirke el rubak er se el beluu a ngar er a bai el rokui. Ngike el uleba ngika el rubak el mo a subedeterir el kmo ngika kid a sehelimiu. Me ng di oisechii e lmuut el nguu el mo er a blai. Ise ikid e ngii a mochu okedongall er se el dui el mle kirel el mo meluchel er ngii.

A kleangel se lemedasech a bai er se el beluu e tir a chousii a meolt e rullii el kmal mo klebokel e nguu el mo kobsii er a bebul se el kingellel ngike el merreder er a beluu. Tia el bai a birir a rebeldekel se el beluu. Se el lebo locheraol er se el bai e ngike el rubak a mo meluluuch er a rebeldekel se el beluu el omekngaltengat er se el ocheraol.

Ise a uchul e ngike el beches el mo rubak a mo kie er a eungel se el kleangel el belkul a mo nguu a dui er a rebeldekel se el beluu.

Ngike el beches el mo Ibedul a mo melai er a dekedekel a btelul er a Beliliou. Me a beches el mo Reklai a mo olsarech er a teliakl er a Ngcheangel.

ONGEDE EL BLIONGEL

*****|||*****

CHUTEM ME A CHEI

CHUTEM

A chutem er a Belau a ua tia kid a rolel, ng ngar er ngii a rois, ked, chereomel, ngeaol, omeklochel, dechel, omrekongel, mesei, lius beluu me a beluu.

Rois. A rois aike el mekididai el chereomel el oumesingd el di bad.

Ked. A ked a dirrek e mekididai e ng di diak a meklou el kerrekar er ngii. Ng di chudel me a chitouch me a mekekerei el kerrekar a ngar er ngii.

Chereomel. A chereomel aike el chutem el ngar er ngii a bek el bedengel a kerrekar me a besebes me a emull el dimlak a chad el melalem, ng di mle ngii el dubech.

Ngeaol. A ngeaol aike el cheromel e kede totem e ousers. E aike el ked el dousers a di doleker el kmo sers.

Omeklochel. A omeklochel aike el chutem el ngar er ngii a dechel me a omrekongel me a mesei.

Dechel. A dechel aike el mle mesei e mla mechoit me ng diak a dait me a lechub e ng brak el dellomel er ngii me ng di chudel.

Omrekongel. A omrekongel a di ua ia mesei e ng di kuk dellomel a brak er ngii.

Mesei. A mesei aike el chutem el blechoel el klou a ralm er ngii me ng medemedemek e dellomel a dait er ngii.

Lius Beluu. A lius beluu aike el doker el kmo ng chereomel er a lius. Aika el lius beluu a ngar er ngii a bebil er a beluu el di mla ngar er ngii a lius beluu er ngii me a bebil er a beluu a kuk mle er se el taem er a Siabal e a tekoi er a Amt er a Siabal a tilobed el kmo a bek el beluu er a Belau a mo melalem a lius el mo lius beluu me ng bek el beluu er a Belau a mlo melalem a lius. A uchul e ng lius beluu a lius a dellomel er a chutem beluu me aika el lius a lius er a beluu.

Beluu. A beluu aike el chutem el ngar er ngii a delengchokl er a rechad er ngii. Me ng ngar er ngii a chades me a blai me a bai me a diangel er ngii.

CHEI

Chelecha kede kuk mo er a chei. Me a che a ngar er ngii a kebokeb, keburs, taoch, demetaoch, lalou, uet, lemau, kereker, chis, dailechei, melekesokl, ngeraol, oreall, chiloil, chelemoll, me a daimechesengel.

Kebokeb. A kebokeb se el ulebengelel a keburs me a klechutem.

Keburs. A keburs se el ngar er ngii a kebokeb me a demetaoch me a taoch me a lalou e ngelengelotel a doraal er ngii e ngar er ngii a bek el bedengel a kerrekar er a daob er ngii. Aika el kerrekar a diak el sebechel dubech er aike el diak a daob er ngii.

Taoch. A taoch a oumesingd el uriur er a omoachel me ng ko er a omoachel el merael er a chysel a keburs. E ng di meklou e dmolech me ng sebechel a bilas me a mlai el merael er ngii. Me aika el taoch a mo er a beluu el ngar er ngii a delengchokl er ngii me a kuk bebil a di mo er a klechutem el mla er ngii a delengchokl er ngii er a irechar.

Demetaoch. A demetaoch aike el mekekere el taoch el diak lebo er a klechutem. Ng di mo er a chysel a keburs me aike el mekekere el metucheklel a taoch.

Lalou. A lalou se el ulebengelel a kerrar er keburs me a uet.

Uet. A uet a delongelel a lalou me a kereker. Se el lebo lemeched a che e ng diak lebo el meched ng di dmolech e betok mekemanget el char er ngii. A uet a di ngar er ngii er aike el beluu el ngar er ngii a keburs er ngii. Aike el ouchelechol el beluu a diak a uet er ngii.

Lemau. A lemau aike el mekeke el toachel el ngar er a belngel a kereker me a lechub e ngar er a chysel a uet. A uchul e ng lemau a diak lsa el dmolech e ng di mellemau a domes er ngii.

Kereker. A kereker se el delongelel a uet me a dailechei el se el lebo el meched a che e ng mo meched el mo diak a daob er ngii.

Chis. A chis aike el ngar er a belngel a kereker el se el bo el meched a chei e ngii a diak lebo el meched e di ngar er ngii a daob er ngii. A uchul e kede kmo ng chis a ua ia deremechis.

Dailechei. A dailechei a se el delongelel a kereker me a chelmoll el bo el meched a chei e ng diak lebo el meched. Aike el louchelechol el beluu a dailechei er ngii a di meched el mo er a oreal me ng diak a ngeraol er ngii e ngar er ngii a bad me a merangd

me kede ousbech el ngar er a che er ngii. E aike el oukeburs a dailechei er ngii a toachel el mo er a ngeraol.

Melekesokl. A melekesokl aike el meched el ngar er a delongelel a kereker me a chelmoll.

Ngeraol. A ngeraol aike el beluu el toachel a dailechei er ngii a ngar er ngii se el tkul a meched el ngar er a oreall me a dailechei, ise ikid a ngeraol.

Oreall. A oreall se el bo el meched a che e se el kot el mo meched er a chelmoll el ngar er ngii aike el meklou el bad el me chuob se ikid a oreall.

Chiloil. A chiloil aike el meklou el bad el ngar er a oreall.

Chelmoll. A chelmoll a ikrel a oreall el lebo lomodes a daob er ngii.

Daimechesengel. A daimechesengel a delongelel a chelmoll me a uchul a eanged.

OLIOCHEL ER A CHUTEM

Elecha e kede kuk mo imuul el mo er a oliochel er a chutem. A oliochel er a chutem er a irechar a mle ked, bad, kerrekar, teletelel a chutem, dellomel, cheliuis, euatel, omoachel me a lechub e ng diong. Elecha el taem e kede ousbech a *smengt*.

Ked. Se er a irechar e ng dimlak a omeluk el chutem me ng dimlak a omelalem el smengt. A chad a sebechel el ouchutem el mo tmurk er a ked, e se el ked a mocha oliochel er ngii me a ta er a chad.

Bad. A rebebil er a rechad uluusbech a bad. Aika el bad a meklou el lengai el mo locha er a ulebengelel a ta me a ta er a rechad el oliochel.

Kerrekar. A rebebil a ousbech a kerrekar. Te uluusbech el melalem aike el mo meklou el kerrekar el ua ukall me a lechub e ng miich me a lechub e ngii di el kerrekar el dechor er a oliochel er a chutem el omii er a chetemel a ta me a ta er a rechad.

Teletelel a Chutem. A kuk bebil er a rechad a ousbech er a teletelel a chutem el oliochel. Se el teletelel a chutem a loltirakl er ngii me aike el tkul a lousbech el oliochel.

Dellomel. A rebebil er a rechad a ousbech el melalem a tuu me a lechub a meduu me a lechub a lius el oliochel er a chutem.

Euatel. A rebebil er a rechad a uluusbech a euatel. A irechar e aike el chades er a beluu a ngar er ngii aike el siseball el mo er a chelsel a beluu el cheldukl er a bad el mekididai er a bita me a bita el chades, aike ikid a euatel. A uchul me ng euatel a lengar

er ngii a mekemad el me er a beluu e te oueuatel er ngii a rechad er se el beluu e oumekemad er a recheraro. A euatel el tekoi a belkul a omerotel. Se el dengar er ngii e omart er kid er a cheraro.

Omoachel Me A Diong. A omoachel me a diong a dirrek el oliochel er a chutem. A bita el diong me a lechub e ng omoachel a omii er a chetemel a ta me a ta er a rechad.

Smengt. A smengt a mlo er ngii er se er a leme a rechad er a Siabal me blo loluk a chutem er a Belau. Se ikid e kid a mlochu melalem a smengt el oliochel er a chutem el me lmuut er a elechang.

BLINGELEL A CHUTEM ER A IRECHAR

A blingelel a chutem er a irechar a mla er ngii a **chutem buai, chutem beluu, chutem er a kebliil, tungel** me **chetemir a redersta el chad.**

Chutem buai. A irechar e ng mla er ngii a chutem buai. A chutem buai aike el chutem el klalo er a chimo el beluu. Aika el chutem a sebechir a rebek el chad el ousbech. A merreder er a chutem buai a merreder er a beluu. Ngika a di ngar er ngii a klisichel a lsekum a ta er a rechad er a ngodech el beluu a soiseb er se el oliochel er a chutem buai, e ng ngar er ngii a klisichel a merreder er a beluu el lodikii. E ng di a lsekum te chad er se el beluu e ng di subed. A chutem buai se el oliochel er a beluu me a beluu me a chimo er a beluu el mo lmuut er se el ngar er ngii a chutem beluu me a chutem er a kebliil me a chetemir a rechad. Aika el chutem a **mlengai er a mekemad** me a **mlokoll** me a **mlengai er a ulecheracheb** me a **mlongit** me aike el mlo **tiklel** se el beluu. A uchul me ng chutem buai a ngar er a buai er a rechad er a beluu. Me ng sebechir a rechad er se el beluu el diak losubed e mo melobech a kerrekar er a chelsel aika el chutem me ng klokliir. E ng di nguu a chutem el mo kloklel a bedengel a diak el sebechel.

A **mlokoll** el chutem a lsekum a beluu a mlengai er a mekemad me te chiliis a rechad er ngii el mo er a chimo er a beluu e ngike el merreder er se el beluu el chiliis a rechad er ngii a mo meketii a udoud el mo er se el beluu el ua lomechar er a chutem el lebo lekie er ngii tirke el chiliis el chad. Me a merreder er tia el beluu a otebedii a chutem el mesterir. Tia ikid el chutem a doleker er ngii el kmo mlokoll el chutem.

Chelecha aike el chutem el mle tiklel a beluu a ua tia kid a rofel. A lsekum ngar er ngii a beluu el soal el mo oumekemad er a chimo er a beluu el soal melai er ngii e diak el sebechel e ng mo olengit er a bebil er a beluu el mo olengeseu er tir el oumekemad el nguu se el beluu. E ngike el merreder a mo omoket a udoud el tiklel aike el beluu el ullengeseu er tir. E a lsekum me a chimo er aika el beluu a mo diak a tiklel el udoud e ng otebedii a chutem me a lechub e ng che me a lechub e ng omerreder el msa se el beluu el mlo diak a tiklel el udoud me ng tiklel. A tiakl a ua ia lomeksullel a beluu el ullengeseu er kid er a mekemad.

A oliochel er a chutem buai a mloterkokl el okiu a siukang, me a mekemad me a cheldechoduch er a omerael er a uchelel a beluu. Me aika el oliochel a di oltirakl aike el di mla oliochel er ngii er a uche er se er a lemengai.

Chutem beluu. A chutem beluu a rael, klubed, omekedecheraol bai, diangel, lius beluu me aike el kerengel se el beluu er a irechar e mla mechoit el mo diak a rechad er ngii. A kerengel aike el mekekere el beluu el mesiungel se el klou el beluu.

A chutem beluu a oumesingd el mle chetemir a derta el chad me a lechub e ng kebliil e a rechad er a beluu a ngilai el bo lousbech a beluu. Aika lullai a beluu el ousbech el mo rael, omekedecheraol er a bai, diangel, me a lechub e ng klubed. A lius beluu aike el chutem el dimlak a delengchokl er ngii e a beluu a mlo soal el ousbech me ng dualem a lius er ngii me ng lius beluu.

Chutem er a Kebliil. A chutem er a kebliil a ua aike el bla desaod er a omesodel a kebliil el kmo ngike el chutem el blo lekerd er ngii tirke el chad el kot el mlo dibechii se el omesolel a blai er se el kebliil. A bebil er a chutem er a kebliil a mlengai er a omesiou me a lechub e ng mle chelebechiil me a dirrek a kuk di mlongit. Aike el mle chelebechiil a lsekum me ng dimlak letobed er tirke el telungalek el ulsiseb e tir a mla nguemed e ng mo medechel el me lmuut er a chelecha e ng mocha chutem er se el kebliil.

A merreder a chutem er a kebliil ngike el merreder er a kebliil. Ngika el merreder a lsekum me ng ochell e ng sebechel lotobed a chutem el mo er a rechad. E ng di a lsekum me ng ulechell e ng diak. Ng kirel, a lsekum me ng soal el oltobed er a chutem e ng melai er a turk er ngike el klou el ochell me a ruurrot er se el blai.

A blingelel a chutem er a kebliil a loungerachel a merreder er a kebliil. A lsekum ngar er ngii a ta er a rechad er a kebliil el soal el omekedechor er a bliil e diak a chetemel

e ng sebechel el olturk me a lechub e ng olengit er a merreder er a kebliil me lebsa ta er a chutem me lokedecherur a bliil er ngii. Me ngika el chad a di kie er a chutem e ng di diak el sebechel el choderderii el msa ngelekel me lebo el chetemel. Ng dirrek el ngar er ngii a bebil er a rechad er a kebliil el ngar er ngii a chetemir el kloklel a bedengir el kmo ng locha mle chelebechielir a rederrir me a lechub e ng chetemir er a redemerir. Me a ta er a ngerchelel a merreder er a kebliil a omes er a bek el chad er a kebliil er a delengchekkir me a techerel beserir. A lengar er ngii a chad er a kebliil el ousbech er a telkib el chutem el mo sers me a lechub e ng mesei e ngar er ngii a chutem er a kebliil el mededaes e ng sebechel ngike el merreder el nguu el msa ngike el metacherbesul el chad me ng ousbech er ngii.

Ng ngar er ngii a eru el meklou a ultutelel el chutem er a kebliil el diak el sebechel el tuobed el mo er a rechad. A kot a omesolel a blai. A omesolel a blai el chutem se el chutem el dechor er ngii a uchul a delengchokl er se el kebliil. Ongeru a lkul a dui. A lkul a dui a mesei el di ua roel a omesolel a blai. Se el mesei el kirel ngike el rubak el meluchel er a dui er se el kebliil.

Elecha e ng ngar er ngii a chutem er a kebliil el ousbech a beluu. Aika el chutem a mlongit er a rechad er a beluu me bo lousbech a beluu el mekedechor a bai, diangel me a lechub e ng mo rael. Me aika a ua lebla lebo el chutem er a beluu.

Tungel. A tungel a oreomel el chetemel a chelid, me ng diak a chad el merreder er ngii. Ng dirrek el chedaol el diak el sebeched el soiseb er a chelsel me a ka dolobech a kerrekar er a chelsel. A dedobech a kerrekar er a chelsel e kede mo smecher. A tungel a di ngike el mo meluchelchelid a mo oungerachel el ua longkar er tia el chutem. Aika el tungel a diak el sebechel el tuobed el mo er a rechad el chetemir e le ng mekull.

Chetemira Rederta El Chad. A chutem el doleker el kmo chetemir a rederta el chad a chutem el kloklel a bedengel a chad. Aika el chutem a mlengai el mlochar, mlongit, ulsiungel, me a lechub e a demal me delal a milsa a ngelekel me ng kloklel. Aika ikid el chutem a chetemel a bedengel a chad. Ng diak a ngodech el chad el merreder er a chetemel a bedengel a chad. Ng di ngike el chad el ouklalo er ngii, ngike a merreder er a chutem. Ng sebechel el oterur me a lechub e ng nguu el msa ngelekel me a lechub e ng otebedii el mo ulsiungel. A lsekum tia el chutem a mlo diak ltobed e ngika

el chad el ouchutem er tia el chutem a mla mad e diak a ngelekel me a lechub a rebebil er ngii e ng sebechel tia el chutem el mo medechel el mo chutem er a kebliil.

OIDEL A CHUTEM

Aika el chutem el bla desaod ng kuk milekera e moiuid el mo er a ta er a chad me a lechub e ng kebliil me a lechub e ng beluu.

A kot a chutem el mlengai er a mekemad. A beluu se el lebo loumekemad er a ta er a beluu e bo el mesisiich e te nguu a chetemel se el beluu. Ng dirrek aike el beluu el kuk mlo olengeseu er se el beluu el mlo mesisiich a mo er ngii a tiklir el chutem a lsekum me ng mlo diak a udoud el mo tiakl.

A ongeru, a chutem er a kebliil a sebechel el moiuid el mo er a ta er a kebliil, a lsekum a rechad er se el ta er a kebliil a mla nguemed.

A ongede a omeluchel. A lsekum a chad a mo diak a ududel e ng sebechel el otebedii a chutem el msa ngike el chad el meluchel el mo er ngii.

A ongeua a ulecheracheb. Ngar er ngii a bebil er a chutem el mlengai el mo er a ta er a rechad el okiu a ulecheracheb.

A ongeim a mlochelochel. A mochelochel el chutem a lsekum a ta er a chad el ngar er eou el chad a rirellii a meknngit el omeruul el mo er a bechil a ngar er a bab el chad e ng meluked el oba udoud e a lak a udoud e ng sebechel a chutem.

A ongelolem a saker. A lsekum a sechal a mlo osiik er a bechil a ta er a sechal e mo sechelil, e ngika el sechal el bechil ngika el redil a omals er ngike el ta er a sechal. Me ngika el sechal a lsekum me ng diak el sebechel el ousaker el oba udoud e ng ousaker el oba chutem.

A ongeuid a chelebechiil. Ng ua aike el bla desuub el kmo, se el lemad a bechiil el chad e ng mo er ngii a cheldechuduch. Me a lebo er ngii a cheldechuduch e ng ngar er ngii a chelebechiil. Tia el chelebechiil a sebechel el udoud me a lechub e ng chutem.

A ongeai a olemesumech. A lsekum a teru el kaubuch el chad a mlo er ngii a telemall er a delongelir e a sechal a mlo uchul a telemellel a chebechielir me te mocha merek el kaubuch, e a sechal a melemesumech er a redil. A lolemesumech e ng sebechel el ousbech a udoud me a lechub e ng chutem.

A ongetiu a klaitutechei. A klaitutechei el tekoi a locha di dodengeli el rokui. Se el bo el soam a kloklel a chad me a ta er a rechad a soal a kloklem e ng sebechiu el kaitutechei aika el klalo. Me a chutem me ng ua ise el sebeched el mengaitutechei. A leblo el soam a chetemel a ta er a rechad e le ng kmeed er a chetemem e kau kuk ngar er ngii a chetemem el kmeed er ngika el chad e ng sebechiu el mo katekoi e kaitutechei aika el chutem. Me a lechub e ng kuk betok a chetemem e diak a mesei e a ta er a rechad a betok a meklechel e mekesai a chetemel e ng sebechiu el kaitutechei a meselech me a chutem.

A ongeteruich a oterul a chutem. A irechar e ng mla er ngii aike el chutem el doleker el kmo mlokoll. A ulekoll el chutem a bla desodii. Aika el chutem a kuk lechelecha el taem e kede kmo mlochar, me a lechub e ng mloterau. A chutem er a Belau er se er a lokot el me rechad er a Ngebard e ng mla er ngii a mloterau el mo er tirka el ngebard. A ua leble el kot el chad er a Ngebard el me er a Belau a rechad er a Sebangiol er se er a 1886. Tirka a mla er a Belau el mo lmuut er a 1899. Tirka el Isebangiol a mle melekingel a chelid. Te uluusbech a chutem el omekedechor a Ikelesia. Me ng ngar er ngii a bebil er a chutem el mlengai el mlochar me a kuk di mlongit er tirka el chad er a Sebangiol. E ng di aika el chutem el mlengai er a rechad er a Sebangiol a di mle mekesai, el oumesingd er aika el chutem a lulemekedechor a Ikelesia er ngii.

A rungeru el chad er a Ngebard el mle er a Belau a rechad er a Dois. Tirka a mle er se er a 1899. Te mla er a Belau el mo lmuut er a 1914. Tia ikid el taem er a Dois e a mloterau el chutem a mle oisab el betok.

A uriur er a rechad er a Dois e te mle rechad er a Siabal. A leme a rechad er a Siabal e a mle moktek er tir a mle el me kie er a Belau. Ng kmal mle betok el chutem er a Belau a mlochar me a di mlengai el blo lousbech a rechad er a Siabal. Tirka el chad er a Siabal a mle er se er a uriur er a kot el mekemad er a beluulechad. Te mle er se er a 1914. Te ngiluu a omerreder er aika el iungs er a rechad er a Dois e kilie er a Belau. Te kiliei er a Belau el mo lmuut er ulebengelel a ongeru el mekemad er a beluulechad er se er a 1945. Tia ikid el taem el lekilie er a Belau e ng kmal el betok el chutem a mlengai el mo klalo er a Amt er a Siabal. Se er a lebo el lemerek a ongeru el mekemad me leme a rechad er a Merikel e aike el chutem el mlengai er a rechad er a Siabal a mloiuid el mo er

a Amt er a Trust Territory. Aika el chutem a bebil er ngii a mla moluut e a bebil a dirk merael a kerrekeriil er ngii el mo olterkokl er a remera el louklalo aika el chutem.

ONGEUA EL BLIONGEL

*****IV*****

OMERREDER

OMERREDER

Omerreder a uldimukl er ngii a eru el tekoi. Ng ngar er ngii a **klisiich** me a **ngerachel**. A **klisiich** el tekoi a betok a belkul e ng di belkul el debo dousbech er ngii er tia el hong a llemalt.

A leua ise e a merreder el oba klisiich. A merreder el ngar er ngii a llemtel el meruul a tekoi me a lechub e ng melib omeruul el ungil er tirke el chad el ngar er a eungel. Tia el tekoi el kmo: **meruul a ungil el kirir tirke el chad el ngar er a eungek**, a kmal utebengall e le tia ikid a uchetemel se el llemalt el loba chad el merreder. A lsekum a merreder a di meruul aike el ungil er ngii e diak lomdasu er tirke el chad el ngar er a eungel e ng mla mo diak a llemtel el merreder er tir. Se el donguiu e dorrenges a chisir tirke el mle ungil el merreder er a irechar el me lmuut er a elecha el taem, e kede mo metik el kmo: a kmal klou a ultutelel el kerbai el uleba tirka ikid el ungil el merreder a tia ikid el tekoi; **tia ng ungil er a rechad el ngar er a eungek, a da ng diak?** Tirke el merreder el mlo iis me a lechub e te mlodechelakl er a rechad el ngar er a eungir, me a lechub e ng mlo diak lemorrenges a tekingir, a tirke el merreder el ulebes el kmo klisiich el uleba a llemalt el lebilsterir tirke el chad el mla er a eungir. (**monguiu er a cheldechedechal a Meruk me a Bechars**). Ng ngar er ngii a rebebil er a remerreder el mlodechelakl el kuk di cheleche a uchul. Se er a lemengilt a chad el mo merreder e a rechad a kilenge el kmo, ng di ungil a chobo morreder er kemam. Se ikid el taem e a rechad a ua ledilu el kmo aki meskau a llemalt me a klisiich me ke merreder er kemam. A chomorreder er kemam e ng kirem el omtebechel, e mengkar e mesiou e omekrael er kemam.

A ta er a tekoi el uldimukl er a chelsel omerreder a **ngerachel**. A klisiich me a ngerachel el tekoi a diak el sebechel el mo kakeakl. Aika el teblo el tekoi a ua lekaubuch. A chad se el lemengilt el mo merreder er a ngii di el ngerang e ng nguu a klou el ngerachel er a rechad el ngileltii el mo merreder. Ng kirel el melasem el mo er aike el sebechel el oltaut a uldesuir a rechad el ngar er a eou e oba el me er a bab.

Omerreder omuchel er a ongalek. A domes er a merreder er a ongalek, e ng oltaut, omesieur, mellach, olsisechakl, mengkar, mesiou, e omtebechel er a rechad el ngar er a chelsel a ongalek er ngii.

Se el debo dechelellakl e dosuub er a teletelel a omerreder er kid el oeak a siukang e kede mo metik el kmo ng diak lsa el ngodech er a teletael er a omerreder er a betok el beluu er a beluulechad. A domes er a merreder er a Merikel, Siabal me a England e te olab a klisiich me a ngerachel el bisterir a rechad er aike el belurir. Te merreder el oltirakl a uldesuir me a sorir a rechad el millilt er tir.

A omesubed er a omerreder a mo omuchel er a kot er eou e oba el me er a bab. Kede mo omuchel er a ongalek, telungalek, kebliil, klebliil, cheldebechel, merreder er a beluu me a merreder er a bita el eanged me a bita el eanged.

ONGALEK.

Te reua techa a ongalek? A ongalek a chedam me a chedil me a rengelekir el ulemechell er tir me a cheltekllir me a redellir. Tirka ikid a ongalek. A chelsel a ongalek a ngar er ngii a merreder er ngii. A merreder er a ongalek a chedam me a chedil.

Klisichel a chedam. A klisichel a chedam a merreder a chutem me a mesei el ousbech me a udoud me a blai me a mlai me chebechielir a rengelekel. A lekenge a demerir a rengalek e te mo bechiil e a lak lekenge e ng diak lebo el bechiil. A lsekum e ng kilenge er a ngelekel el sechal me ng mo bechiil e a klileakl el blai er ngii a loungerachel er ngii. A lsekum ng omdasu el kmo ng mla mo sebechel a ngelekel el mo ileakl el blai e ng eklii a delengcheklel.

Ngerchelel a Chedam. A ngerchelel a chedam a oungerachel el melabek a belsir a rengelekel el sechal. Ng dirrek el oungerachel er a blai el lebo el kie er ngii a ngelekel el sechal a lsekum ng kilenge er a ngelekel me ng mo ileakl el blai. A rengelekel el redil a leblo el bechiil e ng mo oungerachel el meruul a uesir.

Klisichel a Chedil. A chedil a kmal klou a klisichel. Ng merreder er a rengalek er a ongalek el mo lmuut er a telungalek.

Ngerchelel a Chedil. A ngerchelel a chedil a omekerreu er a rengalek, e meruul a uesir tirke el ochedal a bechil me a di chedal a bechil el redil. A dirrek el ta er a kmal klou el ngerchelel a chedil a mellach e olisechakl er a rengalek er a tekoi er a klechad.

Ngerchelir a Rengalek. A rengalek a dirrek el ngar er ngii a ngerchelir. A ngerchelir a olengeseu er a chedam me a chedil. A rengalek el redil a olengeseu er a derrir el ngar er a mesei e mangedmokl er a blai. A rengalek el sechal a ngar er a che e

meruul aike el ku urrerir a resechal. A ta er a klou el ngerchelir a rengalek a olengesenges er a chedam me a chedil. A olengesenges el tekoi a kmal ungil a bo dodengeli el kmo ng kired el oba ungil reng e meruul aike el ledu er kid a delad me a demad. A lsekum a demad a oldurech er kid el mo omngar e ng diak di dekengei e lak debo doruul er a tekoi. A lsekum ng dimlak moruul er a tekoi e ng dimlak molengesenges. A lechub e a kuk dekilenge me debocha doruul er a tekoi e ng diak dongeremrum me a lechub el kesib a rengud e doruul er a tekoi. Ng kired el meruul er a tekoi el oba ungil el reng.

A ta er a kmal klou el ngerchelir a rengalek a omengull. Tia el omengull a mo er a chedam me a chedil me a rubekud me a rechudeled me a remeklou el chad er a beluu me a resechelid me a llach er a beluu. A lsekum a ngalek el sechal a mo er a che ngii me a demal e ng diak lebo el dengchokl er a bluu er a brer me a lechub a mlai el bechire a demal me lolikes. Tia el omeruul a diak lomengull. Ng kirel a chedam el mo reboreb er a bluu er a brer me a lechub a mlai e a ngelekel a melikes. Se el ome el ngar er a che kau me a demam e ke meruul a ngikel e a demam a mo melecholb e me me ng reboreb er a blai.

A ngalek el redil a lsekum me ng ngar er a blai e ng mo er ngii a blengur e ng diak lebo el dengchokl e a delal me a lechub a chudelel lebekiis el mo olekeed a kall e ngii ledengchokl. Ng bai kirel el ngii a mekiis el olekeed a kelel a delal me a demal. A bo lemerek a blengur e ng melai a blatong er a mederir e olekeed a olbellir. A lebo er a mesei e ng mo melouch a ramek e olengeseu er a delal el meluchel a klebngir el me er a blai. Tia el omengull a dirrek el ua ise el mo er a remeklou er kid el sechal me a redil.

A kuk denguu el mo er a remeklou el chad er a beluu e ng ua tia kid a rolel. A lsekum ke merael er a rael e osiueklii a klou el chad me a lechub e ng rubak me a mechas e ke mo touchakl er a tkul a rael e ngii a merael. Ng diak kobo moltitech er ngii me lebo er a tkul a rael.

A omengull er a llach er a beluu a kirir a rengalek me a remeklou. A lsekum ngar er ngii a llach el kmo ng diak a mengerodech er a beluu e ng diak mongerodech. Ng kired el oltirakl a llach e diak dolemall.

A ta er a ngerchelir a rengalek a mesuub a tekoi er a klechad. A chedil me a chedam a oungerachel el olisechakl a tekoi er a klechad e a rengalek a kirir el mesuub me a ta er a

klebese e ng sebechir el kuk mo olisechakl er a rengelekir. A rengalek el sechal a mesuub el mengereker, melasech a mlai, meruul a biskang, e ngar er a chei. A rengalek el redil a mesuub el meliokl, ngar er a mesei e mangedmokl er a blai.

Chelecha el taem e ng kmal klou a omelekoi er a remeklou el chad er a beluu me a rebebil er a redemerir me a rederrir a rengalek el kmo, a rengalek er a chelecha el taem a di kea longull er a remeklou el chad er a beluu me a demerir me a rederrir. Tia ng locha mera me a lechub e ng blulak? A domdasu e tia a locha mera el ua tia kid a uchul. A rengalek er a chelecha a mla mo ousbech a beches el uldasu. Tia a uldasu er a regebard. Te omdasu el kmo a remeklou el chad er a beluu me a rechedam me a rechedil a diak ngera el lodenge er a uldasu er a Ngebard. A rengalek a mla mo omdasu el kmo kede mla mo mimokl el ngar er a eungel a beches el kabelmengt me a llach, me a tekoi er a irechar a mla mo diak a belkul. Tia ng klemerang? A rebek el chad a mera el mla mo mimokl me a ngar er ngii a beches el llach me a uldasu, e ng di diak lebelkul a kmo aike el tekoi er a irechar a mekngrit el rokui me ng diak doltirakl. Ng ngar er ngii a ungil me a kuk mla mo mekngrit er a teletael er a delengchokl er a chelechal taem. Me a uldasu er a Ngebard me ng ua isei. A ta er a ungil el bla lobes er ngii a rengalek a **omengull**. A omengull el tekoi a bek el beluu er a beluulechad a di ngar er ngii er ngii tia el tekoi er a irechar el me lmuut er a chelechang. Me a beches el uldasu a diak ledu el ua se kede choitii a omengull. Te di rengalek a omdasu el ua ise e ng di ngii a diak. A leua ise e a ta er a klou el ngerchelir a rengalek er a chelecha el taem a melilt aike el ungil er aika el beches el uldasu me kede mo ousbech e aike el mekngrit a dechoit. Ng di osisiu ngii me aike el mechut el uldasu, a ungil a dousbech e a mekngrit a dechoit.

TELUNGALEK

Te ngera a telungalek? A telungalek a chedam me a chedil me a rengelekir me a rengelekir a rengelekir. A telungalek a ua loldak a eru el ongalek. Aika el ongalek a kakerous el ongalek. A ngalek el redil me a lechub e ng sechal er a ta er a ongalek se el lebo el bechiil e ng mo bechil a sechal me a lechub e ng redil er a kuk ta er a ongalek. A merreder er a telungalek a chedam me a chedil. Tirke el ngelekir a rengelekir el redil a kuk ngar er ngii a demerir el merreder er tir. Ngika el demerir a di merreder a delengcheklir me a chelebechielir me a kerrekerngir el udoud me aike el rokui el dubech

el kirir tirka el ngelekel. A kmal klou a klisichel er a omerreder a ngike el chedil er se el kot el ongalek.

UCHELEL A KEBLIIL

A kebliil a di ua cheldechedechal a uchelel a Belau el diak desa el medengeli el kmo ng dilubech er a oingerang. Ng di ngar er ngii a cheldecheduch el chelid el mesaod er a uchelel a kebliil. Tia el cheldecheduch a dirrek el ulemuchel er a Ngeaur.

A ta er a klebese, e a Kebliil me a Seked me a Dedaes me a Techebngir a mla er a Ngeaur e me er a Beliliou. A leme er a Beliliou e te mlo er a Iretech er a Ngesileong er a Ngerdelolek. Te ngar er a Ngedelolek e ng mo dioll a Kebliil. Ng mlechell er a teua el ngalek. Te mlo meklou tirka el ngalek el mocha sebechir el ileakl el delengchokl. Te mlo kakeakl a delengcheklir. A lebocha el kakeakl el delengchokl e te di uleba a derrir el ua lolehotir el kmo te di ngelekel a ta el redil. Tia ikid a uchul e kede mesaod er a kebliil el kmo ng klauchad el okiu a rasech. E a klebliil a klauchad el moak er a omerael me a klaodengei me a klaingeseu er a rechad er a irechar. Me a leua ise e a kebliil a ulterkokl a ta el chad el merreder er ngii e a klebliil a diak.

KEBLIIL

Ngera a kebliil? A kebliil a klauchad el oltirakl er a rasech. Me a leua ise e a rengelekir a ruchad me a rudam me a rengelekir a rengelekir tirka ikid a uldimukl er a kebliil.

A ngklel a kebliil a bo dosiik er ngii e ng oltirakl er a ngklel a uchelel a omesolel a blai. Tia, se er a kmal irechar e a rechad er a Belau a milrael a beluu. A lsekum a ongalek a kilie er a ta er a beluu e melukl el mo er a ta er a beluu el kuk mo melibeche er a beches el delengcheklir e se el chutem el bo el kie er ngii a ledibecheii a ngklel. E tia el ngakl a mocha ngklel a kebliil se el bocha lomechell tia el ongalek el mo obtois.

Ngike el kot el klou el sechal el ochell er se kebliil el meluchel er a dui er se el kebliil ngike ikid a merreder er a kebliil. A ochell a ngelekir a redil er se el blai. Ngika el merreder er a kebliil a merreder a chutem, mesei, me a udoud er a kebliil. A lsekum me ng mlo diak el sebechel a ochell er se el blai el mo meluchel er a dui e a ulechell a sebechel el mo merreder me ng tuchelii a dui.

A ulechell a ngelekir a resechal er se el blai. A omerrederel a ulechell a diak lsa el klou el ua ochell. Ng di merreder a uus me a subed er a chelsang me a tekoi er a beluu el me er se el kebliil. A chutem me a mesei me a udoud a di ua longkar ngika el rubak. A otebedel aika el klalo a lolai er a turk er ngike el kot el klou el ochell me a remeklou el ourrot er a se el kebliil.

Chutem Er A Kebliil. A chutem el doleker el kmo chutem er a kebliil, a oumesingd el ike el chutem el blo lekerd er ngii tirke el chad el kot el mlo dibechii se el omesolel a blai er se el kebliil. A bebil er aika el chutem a mlengai er a omesiou me a mle chelebechiil me a dirrek a kuk di mlongit. Aike el mle chelebechiil a lsekum me ng dimlak letobed er tirke el telungalek el ulsiseb aike el chutem e tir a mla nguemed e a chutem a medechel el me lmuut er a chelecha e ng mocha chutem er se el kebliil.

Omesolel A Blai. A omesolel a blai se el blai el uchul a delengchokl er se el kebliil.

Mesei. A mesei er a kebliil a di ua rofel a chutem er a kebliil. A lkul a dui el mesei a di ua rofel a omesolel a blai.

Udoud Er A Kebliil. A udoud er a kebliil a lsekum a rechad el mlengebechiil a derrir a mla nguemed el rokui, e se el udoud a mocha medechel er se el kebliil el oba tirke el chad el kiei. Tirka el chad a diak lsa el ta er tirka el chad el mla mad, te di kauchad el di blai a oldak er tir el mo chad er se el kebliil. Tia ikid el udoud a mocha udoud er a kebliil.

KLEBLIIL.

Ngera klebliil? A klebliil a betok el kebliil el ulekuak a klauchad er tir. Tia el klauchad a mlouak el okiu a omerael me a klaodengei er a irechar. Ng diak a ta el chad el domekedo er ngii el kmo ng merreder er a klebliil. A bek el kebliil a ngar er ngii a merreder er ngii.

A klauchad el okiu a omerael, se el lsekum a chad er a ta er a kebliil a mlo er a ta er a beluu e diak a kmal chedal er se el beluu e a kuk di ta er a blai me a lechub a kebliil er se el beluu a nguu ngike el chad me te kudmeklii, ise e ngika el chad me a keblillel a mocha kauchad ngii me tia el kebliil er tia el beluu.

A klauchad el okiu a klaodenge a di kmeed el mo kaisisiu ngii me a klauchad er a omerael. Ng di mle klaodenge er a rechad er a ta er a kebliil el mo er a ta er a kebliil er a kmo te locha mle kaingeseu er a chelsengrir el mo el mocha kauchad.

Ng diak a merreder er a klebliil. Ng di se el lebo er ngii a chelsang er a chimo er aika el kauchad el kebliil me loleker a merreder er se el kebliil e ngike el oleker ngike ikid a mo oungrachel er se el kldibel er tir.

A klebliil a di kaingeseu er a chelsengrir se el ledubech e merekong. Ng dirrek el diak a doleker el kmo chutem me a udoud me a mesei er a klebliil. A klebliil a diak luterkokl a ngklel el ua kebliil el ngar er ngii a ulterkokl el ngklel. A kebliil a lsekum me ng kauchad ngii me a ta er a kebliil e se el ongeru el kebliil a klebliil el mo er se el kot el kebliil. Chelecha el taem e ng di ike el ngar er a bab el blai a chemolt a klebliil er tir e a ngar er eou el blai a diak lsa el chemolt a kleblilel.

CHELDEBECHEL

Ngera cheldebechel? A cheldebechel tirke el mekekere el chad me a lechub e te rubak me a lechub e te mekekere el redil me a lechub e te mechas er a beluu el mo dmak e dibechii a ngklir el mo ta el chelechad. Tirka a uldesuir me a rengrir a kmeed el mo kaisisiu. Te oureor el kaingeseu er a chelsengrir a rederta me a derta er tir el mo lmuut er a tekoi el beluu. Te blechoel el oba ta el uldasu me a klta el reng el meruul a tekoi. A lsekum te tibir a telbilir el kmo ngera te mo meruul er ngii el kirel a belurir e ng tir el rokui a mo meruul er ngii.

Chelecha e a chimo el beluu a blechoel el eua (4) idobech el cheldebechel a ngar er ngii. Aika bliongel el mo er a bita me a bita el taoch er sel el beluu.

A cheldebechel a mle klisisel a beluu er se er a irechar e dirrek el me lmuut er a chelechang. A cheldebechel a blechoel el kaiuechit er a urreor el beluu me a mekemad me a rokui el tekoi er a beluu el dubech el mo klungiolel a belurir. Aike el beluu el milrael a chisel el mesisiich el beluu er a irechar a mle mesisiich aike el cheldebechel er ngii. Chelecha el taem me ng dirrek el ua isei. Ng diak a cheldebechel el medibech el kuk di kirel el meruul a mekngrit me a chelebirukel el kirel a beluu.

Merreder er a Cheldebechel. Ng techa merreder er a cheldebechel? A irechar e a merreder er a cheldebechel a di mle ua rolet a merreder er a beluu el diak lsiokel er a

rebek el chad er a beluu. Te di tuobed er aike el eua el saus. Ngike el tuobed er a kot el blai ngike a mo merreder e a ongeru me a ongede me a ongeua a ua di lolengeseu er ngii. Me a lengar er ngii a tbiil el tekoi er a chedebechel e te mo dmak e omdasu er ngii. Ngika el merreder er a cheldebechel a merreder er se el bai el birir me a kabekelir a recheldebechel me a ureor er a beluu el loruul er ngii a recheldebechel.

A ngerechelel a oungerachel el oldak a rengrir tirka el cheldebechel el mo ua di el ta el chad. Se el ledu el kmo bo demad e to mo mad el rokui. Ng dirrek el oungerachel er a rokel omesubel a mekemad. Se el lebo losuub a rokel a mekemad e te mo ngmiked a derau e mo merrau el blechedokl. Te mesuub el merael el erbita el olsiseb a ngikel er se el chelsir. Se el lesiseb aika el ngikel e te mo osiu e omekdoad aika el ngikel. Aika el ngikel a ua lechad el cherreuir el lomekoad er tir. Te mo merek el merrau e ng mo er ngii a klaikedaob. A klaikedaob a omesubel a mekemad er a kereker. A recheldebechel a mo er a kereker e obii el mo bita me a bita e mesuub er a rokel a oeang. Tia el oeang a dirrek el rokel a mekemad.

A ta er ngerechelel a merreder er a cheldebechel a meluked a belsir a recheldebechel. Se el lebo er a chimo er a beluu e lengar er ngii a ta er tir el rullii a meknigil el omeruul me lekirel el obals e ngike el merreder er a cheldebechel a kirel meluked a ngkedel ngike el chad. A lsekum a rechad er se el beluu a kuk rirellii a meknigil el mo er tirka el cheldebechel me lekirir el obals e a merreder er tia el cheldebechel a kirel mesuk er se el nguked. Tia el udoud el nguked a lenguu ngika el merreder er a cheldebechel me ng ududel e le ng ngii a oungerachel el meluked a belsir a recheldebechel.

MERREDER ER A BELUU.

Chelecha e kede mo imuul el mo er a omerreder er a beluu. A bek el beluu er a Belau me a beluulechad a ngar er ngii a merreder er ngii. Tirka el merreder a ngar er ngii a klisichir me a ngerechelir el mo er a belurir el lorreder er ngii. Tirka el merreder te milekera e mo merreder? A skel a omerreder a kakerous er a bek el beluu me a Belau a kuk ua tia kid a rokel.

A bo dosiik er a uchul a omerreder er a beluu er a Belau e kede mo metik el kmo aike el blai el mle kot el mo merreder, aike el blai el mle kot el mo er se el beluu el mo

kiei. A uriur er tia e a rechad a mlo er aike el beluu. Me a lebo e te millibech a delengchekkir me aike el chutem el blo lekerd er ngii a lengilai me ng chetemir. Te milekedechor a omesolel a blai er ngii.

A merreder er a irechar a dimlak el lolutk er ngii a rebek el chad er a beluu. Ng ngar er ngii a blai el kirel el me tuobed er ngii a merreder. Me a ta el beluu a ngar er ngii a teruich el bkul a blai me ng ngar er ngii a teruich el telouechel el dui er se el beluu. A chelsel aika el teruich el dui e ng ngar er ngii aike el dedu el kmo eua el saus. Aike el eua el saus a kot, ongeru, ongede, me ongeua el blai er se el beluu. Aika kid el eua el saus a kakerous a rudrchelir. A lsekum ngar er ngii a ngera el tekoi el kirel a beluu el lomdasu er ngii ngike el merreder, e ng oderchii a oderechelel el mesubed er tirke el tetiu el rubak me te mo kldibel er se el birir. Me se el loldurch e ng oderchii a oderechelel el mo subedii ngike el ongerung. Me ngike el ongeru el rubak a oderechii a oderchelel el mo subedii a ongedei. Me a ongedei a odercheii a oderchelel el mo subedii ngike el ongeuang. A lsekum ng ungil besul er a rengrir el teua e te mesubed er ngike el ongeim me ng mesubed er tirke el teim el ngar er a eou e a lungil besul er a rengrir e te kongei. A lsekum te omdasu er se el telbiil el kmal mo meringel er a beluu e te melekoi er ngike el ongeim el kmo molekoi er tirke el teua el rubak me lluat el omdasu e tia ko er a kmal meringel me kele bo lak el sebechir a rebeluu. Ngike el ongeim a ngerel a beluu. A lengar er ngii a mo metacherebesul er a rengrir a rechad er a beluu e ngika ikid a ngerir el melekoi el mesubed er a remerreder.

A bek el beluu er a Belau a blechobech a omerreder er ngii me ng ngar er ngii a kot, ongeru, me a ongede el mo er a teruich. A bebil er a beluu a di kot me a ongeru el rubak a ngar er ngii a rudrchelir e tirke el bebil er a rubak a diak.

A skel a chad el mo merreder a di ua aike el bla desuub el kmo a ruurrot er se el blai a melutk er a rubak el mo omteche er a rubak el mlad. E a rubak er se el beluu a melilt er ngii.

Tirke el mle merreder er a irechar el me lmuut er a chelecha a bo domes e te mle blechoel el mutetechei. Aika a bebil a mluteche el ulekiu a omesiou, blekeu, udoud me a klechelid.

A klisichel a merreder er a irechar a kmal mle mesisiich el diak leua chelechang. Ng mlerreder a klengar er a rechad. A lsekum a merreder a dmue el kmo bo mokodir a techa

el chad e ker di mo mekudir e diak a keril. Ng dirrek el merreder a budech er a bek el delengchokl. A lsekum a merreder a lochedii a rael e ng mo diak a budech er a bek el delengchokl e le bek el klebesei e ng di suebek a rengrir a rechad el kmo a mekemad kele leme er a beluad me lak bo dungil mengereker.

Omesiou er se er a irechar a ua aike el bla desuub el kmo se el leme a rechad er a beluu e tirke el meteet a ngoititerir me te mangedmokl er tir e tir a mocha mesiou er tirka el meteet. Te ngar er ngii a rebebil er a remesiou el kmal mlo ungil me ng ngiluu a omerreder el mo er tir. Tia a rebebil er a remerreder a metord er a rechederir me te ngiluu omerreder el mesterir a rungil el mesiou. A rebebil er a remesiou a kuk di mo sorir a rubak er se el beluu me te ngililtiterir el mo merreder. Se a uchul me a omerreder a iluul el mo er ngike el chad el diak lengii a ochell el kirel mo rubak.

OMERREDER ER A BITA EL EANGED ME A BITA EL EANGED

Tia el Belau a di chimo el beluu e bliongel el mo bita el eanged me a bita el eanged. Tia el tekoi a di ua dedu el kmo a kiukl me a desbedall. Se el lobii e ng mo er ngii a teru el merreder. Tirka a Ibedul er a Oreor me a Reklai er a Melekeok. A Ibedul a oba omerreder er a kiukl me a Reklai a oba desbedall. A bek el beluu a chemur a remerreder er tir. E ng di se el lobii e ngii a mochu ua tia el blekeradel. Me aike el lorreder tirka el teru el rubak a ngeiul a beluu. A lsekum me ng ngar er ngii a chimo er a beluu el rullii a mekngit el mo er tir e te mo katekoi el teru er a ngiul se el beluu e ng mo er ngii a mekemad el nguu se el beluu. A lsekum me ng ngar er ngii a ngera el tekoi el tbiil er a rubekul a Belau e mo ungil er a rengrir e ng mo tekoi e a lak e ng diak lebo el tekoi.

A ngerecheliir tirka el merreder a lsekum ngar er ngii a kldibel er a Belau e ngar er ngii a chad er a chimo er aike el beluu el ngar er a eungir el rullii a mekngit me ng kirel el obals e ngike el merreder er se el bita el eanged a meluked me ng sukur ngike el merreder er a bitang. Ng dirrek a lsekum ngar er ngii a chimo er a beluu el mo oumekemad er a chimo er aike el beluu el ngar er a eungir e ng kirir el mo mesebechakl er se el beluu. A rolel tia el omerreder a di ua rolel a merreder er a chimo el beluu el di merreder aike el tekoi er a beluu a ldubech e diak lorreder el mo lmuut er a chetemir me a delengchekliir a rebek el chad.

A Isekum ngar er ngii a mekngit el dubech er a delongelir tirka el teru el rubak me te mo kaungeroel a ng diak a ta er a rubekul a Belau el sebechel el mo mellach er tir. Ng di Ngirturong er a Ngeremlengui a sebechel el mo mellach er tir e le ng kot el klou el ngelekel a Milad me ng ua lobekrir.

ONGEIM EL BLIONGEL

*****V*****

UDOUD ME A OMENGERKER

UDOUD

Ngera a udoud?

A udoud aike el klalo el dousbech el mengaituteche a klalo. A desa el mo osiik er a uchelel a udoud e kede mo metik el kmo a udoud a mluchel er a klaitutechei. A rechad er a beluulechad er se er a lekot el mo ousbech a udoud e ng dimlak lousbech aika el udoud el dousbech er chelechang. Te di uluusbech el kaituteche a klalo. Aike el klalo a kmal mle meringel a dolab el mengaituteche a bebil er a klalo. A kmo ta er a rechad a mla er ngii a chermel kerbou e soal mengaituteche er a mlil a ta er a rechad e ng kmal meringel a longetakl er a kerbou el mo er a blil ngika el chad el oumlai e kuk lenguu a mlai el mo remei. Tia ikid a uchul e a rechad a mlo osiik a rofel e bo el beot a ua itia el omeruul. Te mlo osiik aike el klalo el beot a dolab el mengaituteche e dirrek el meklou a belkul e mekesai, e sorir a rechad. Me a rengebard a kuk miltik a kolt me a silber el mlo sebechir el ousbech. Me kid a rechad er a Belau a kuk mlo metik aika ikid el udoud er a Belau el sebeched el ousbech me kede mlo ousbech.

A klalo el uluusbech a rechad er a Belau er a uche er a lebo er ngii aika el domekdo el *kmo udoud er a Belau* a diak a rechad er a chelecha el kmal medengei. Ng diak dolasem el mesaod er ngii er tia el hong e le ng mekngit a bo lecheleuid. Ker di medenge er a chelecha el taem el kmo a udoud el uluusbech a rechad er a Belau er a uche er a leme a rechad er a Ngebard a mla er ngii el Udoud er a Belau. A bebil er aika el udoud er a Belau a dirk dousbech a rechad er a Belau er chelecha me a bebil a mla mo diak dousbech.

A udoud er a Belau a ngar er ngii cheldechedechal. Aika el cheldecheduch a mesaod a uchelel a derta er aika el udoud er a Belau. Ngar er ngii a cheldecheduch el kmo a udoud er a Belau a mla er a chelid el mei. Me a kuk bebil er a cheldecheduch a kmo a rechad er a Ngebard a ngilai aika el udoud el me er a Belau. Aika di cheldecheduch e diak a kmal ungil el omesodel e le ng betok a omesodel er a rebek el chad me ng diak dolasem el meluches er tia el hong. Tia el hong a bai di mo mesaod aike el kimulekereker el omesodel a bedengel me a klisichel a udoud er a Belau.

BLINGELEL A UDOUD ER A BELAU

A udoud er a Belau a ngar er ngii a elolem el blingelel. Ng ngar er ngii a Bachel, Kldait, Chelebucheb, Kluk, Delobech, me a Mengatorch. Aika el udoud a ngar er ngii a lmuut el mekekere el blingelel. A bachel a ngar er ngii a bachel el berrak, bachel el mengungau, bachel el merimer, me a bachel el cheldoech. Ng dirrek aika el udoud er a Belau a ngar er ngii a ngklel, e ng di aika el ngklel a udoud a diak debo dosaod er tia el hong e le aika el ngakl a olecholt a uchelel aika el udoud me a blai el ouklalo.

A bachel a ngar er ngii a berrak, mengungau, merimer me a cheldoech. A berrak a ko er a bibrurk a bedengel el ua bedengel a teliud el brak ise a uchul me ng berrak a ngklel. A mengungau a bekerekard el ko er a bedengel a ngau me a uchul me ng mengungau. A merimere a ko er a cheldoech e ng di ngar er ngii llecheklel er a ikrel. A cheldoech a ko er a bedengel a mellemau el butiliang e mengeldoech me a uchul me ng cheldoech. Chelecha e se el dedu el kmo bachel el berrak e ngike el bibrurek el bachel; bachel el mengungau e ngike el bengungau (bekerekard) el bachel; bachel el merimer e ngike el ko er a cheldoech e ng di ngar er ngii a llecheklel me a bachel el cheldoech aike el bachel el mengeldoech el ko er a butiliang. A kldait a di ua blekerdelel a bachel. A lsekum me a kldait el berrak e ngike el bibrurek el kldait.

A chelebucheb me a kluk me a delobech a ngar er ngii a ursel er a ikrel. A chelebucheb a ko er a bedengel a chebucheber a keburs ise a uchul me ng chelebucheb. A ursel a kluk a ko er a techerakl el meliuekl er tia el udoud. A ursel a delobech a ko er a ursel a kluk e ng di teluk el ede el telkael me a uchul me ng delobech.

A udoud er a Belau a ngar er ngii a blingelel. Ngar er ngii a bliongel el mo er a Bachel me a ngar er ngii a bliongel el mo er a Chelebucheb. Aike el bliongel el mo er a Chelebucheb a Kluk me a Delobech. A mesisiich er a aike el bliongel el mo er a Bachel a Bachel. A mesisiich er aike el bliongel el mo er a Chelebucheb a Chelebucheb. A mesisiich el Delobech a klsuk el ede a bril. A bril aike el llecheklel a ikrel a Delobech.

Aika el udoud er a Belau a ngar er ngii a kirel urrerel. A urrerel a Bachel me a Kldait a mo chelebechiil me a ududir a rengalek. A Chelebucheb me a Kluk a mo orau me a buuldiil.

BACHEL. Chelecha e a lsekum ngar er ngii a ede er aika el udoud el di osisiu a ngklil e kede mekera a dolilt er a mesisiich er aika el udoud? Ka denguu a Bachel. A lsekum ngar er ngii a klde el Bachel el di osisiu a meklungel e ng di kakerous a bedengel e ng ngera mesisiich er aika el kldei? A berrak a mesisiich er aike el bebil. A uchul me ng mesisiich ngii el telkib el mekesai er a mengungau me a cheldoech. A ongeru el mesisiich a mengungau e a ongede a merimer e a ongeua a cheldoech.

KLDAIT. A Kldait a di ua blekerdelel a Bachel. A lsekum ngar er ngii a ede el Kldait e a berrak a mesisiich er aike el erung.

CHELEBUCHEB. A mesisiich er a chelebuchebe aike el doleker el kmo cherecheroi el outaoch. A uchul me kede oleker el kmo cherecheroi a bedengel a ko er a bngal a cherecheroi e outaoch el ursel er a ikrel a ngar er ngii a delongelel el melemalt el mo tuobed er a bitang. Aika ikid el delongelel a doleker el kmo ng tochel.

KLUK. A mesisiich el Kluk a bleached. A bleached el Kluk aike el Kluk el ursel er a ikrel a ko er a techerakl. A lsekum aika el techerakl a diak a telemall er ngii e di outecherakl el meliuekl e a chelsel a berrak e se ikid a bleached. A mesisiich er a Delobech a Klsuk.

Elecha a lsekum a chad a dimlak lues a bedengel a udoud el bachel me a lechub a kldait e kede mekera e ochotii er ngii a klisichel a ta er aika el udoud. A mo ocholt a klisichel aika el udoud a kuk bebil er a udoud. A udoud el mo oisechii a klisechel a bachel a chelebuchebe. A lsekum a chad a oker el kmo ng ua ngera a klungel a ngera el bachel e ng di sebeched el kmu a ildisel a chelebuchebe e ngii a ochotii a klungel a bachel. A kldait me ng di ua blekerdelel a bachel. E ng di kuk kluk me a delobech a ochotii a klungel a kldait.

A delobech a kuk Rubekul Belau a mla er ngii cheldechoduch er tir er se el taem er a Siabal, e te mlo katekoi el kmo elecha e a bo dolecha orul a ngeleked el sechal e ng mo diak dolai er a delobech el ongraol. Ise a uchul e ng mlo diak loraal a delobech er a delongelir a rechad. A delobech a di ua kluk el domes aike el ursel er a ikrel.

KLDAIT. Aika kid el udoud el beldukl er a eou a olecholt a klisichel a kldait.

Klisichel a Kldait

Delobech

1. Klsuk
2. Mengsang
3. Tengetremeduu
4. Eliull
5. Elebud

Kldait

- mo er a Klsuk
 mo er a mengsang
 Ongiakl
 mo er a imo el kukau
 mo er a teruich

MENGATORCH. A kot el ngar er a eou el udoud er a irechar a Mengatorch. Aika el udoud a di sebechel el omechar a dersechimo el kual el ilaot. A bedengel a Mengatorch a oumesingd el cheldoech.

SISEBEL A UDOUD ER A IRECHAR

A sisebel a udoud a eru a roled el mo er a rechad er a irechar. A kot a omengereker. A ongeru a sisebel a udoud el okiu a siukang. A omengereker a di dodengeli el kmo ng se el doruul a klalo me a lechub e ng kall e dolterau el mo er a rechad. A irechar e ng mle betok a roled a omengereker el mo er a rechad. Ng mla er ngii a omelasech, omelenges, oudekool, omelai el uel, omelakel el cheluch, omeluches el iars, omengado el blai, omesarech el toluk, me a omeruul miich, ulei, seboseb me a kuk bebil er a omeruul el kall me a klalo.

A sisebel a udoud el okiu a siukang aike el udoud el soiseb el mo er a rechad el ulekiu a siukang. A siukang a ua lellach el doltirakl er ngii a rechad er a Belau. A lsekum ng dubech a siukang el kirem el mo mengoit a udoud er ngii e a lechetim me a Isoam e kau a di kirem el mong. A sisebel a udoud me ng ua isei. A lechetim a udoud me a Isoam e lulekiu a siukang e leko er kau e ke di nguu.

Elecha e kede mo omuchel er a omesubed er a sisebel a udoud er a Belau. A kot el kede mo mesuub a sisebel a udoud el okiu a siukang. A ongeru e kede mo mesuub a omengereker.

SISEBEL A UDOUD EL OKIU A SIUKANG.

Kldiull Me A Cheroll. A irechar e se el lebo el dioll a redil er a ketengel e ng mo er ngii buuldiil. Tia el buuldiil a mo er ngii er se el bla lebo lelolem a bilel a redil. Ng

beketall a udoud el mo er a buuldiil. A udoud el me er a buuldiil a Kluk. Tia a bo losuk er ngii a okdemelel a redil el dioll. Ng dirrek el ngar er ngii a omesumech-ulitech me a dik. Aike el omesumech-ulitech me a dik a bla desaod er a uchei.

Elecha el taem e ng mla mo diak a buuldiil me a omesumech-ulitech me a dik. Aika bla luteche el oba sengk. A sengk se el lemechell a redil er a ketengel e kede mo omoket a sengk el udoud me a klalo el mo er a blil a redil. A demal me a lechub e ng okdemelel a redil a mo mesuk aika el udoud.

Oltngakl: A oltngakl a tekoi er a irechar el lsekum kede nguu a ngklel a ta er tirke el chedal a demad el mengklii a ngeleked, e kede mo sieki a bekai el ilaot me a lechub e ng cheluch me a lechub e ng babii e nguu el mo msa ngike el chad el dengiluu a ngklel. Se el dengai aika el klalo el mo e ngii a mo meskid a udoud el cheral. Tia ikid el udoud a doleker er ngii el kmo Oltngakl.

Osisechakl. A irechar e ng dimlak a skuul el ua aika el skuul er a chelechang. Ng dimlak debo er a skuul el mo mesuub. Ng mla er ngii a rechad el mle meduch el meruul a klalo. Tirka ikid el chad a ululsisechakl er a rechad el meruul a klalo. A lsekum me ng mle soad el mesuub a ngera e kede mo melekoi er a ta er tirka el meduch el meruul a klalo me te mo olisechakl er kid. A ble el soad el mo meduch el melenges e kede mo melekoi er ngike el meduch el melenges me ng olisechakl er kid e kid a mo omsa udoud el omeksullel.

Klomengelungel. A klomengelungel a mla er ngii a eru el bedengel. Ng mla er ngii a Blolobel me a Klemat el Mengol. Se el lebo er ngii a Blolobel e tirke el teruich el rubak er se el beluu a mo katekoi e oltobed er a derta el redil er aike el blirir el mo mengol er se el beluu el kirir el mo megol er ngii. A beluu er a Belau er a irechar a mle ulterkokl aike el beluu el kirir el bo longol er ngii. A osiik er a redil mo mengol a chad el meluchel er a dui er a blil.

Ngika el rubak se el letetkii a redil el mo mengol e ng kmal kirel ngike el redil el mong. A lsekum me ngika el redil a chetil el mo, e ng lmangel e ng di ngii a di mong. Tia el omengol a klou el sisebel a udoud el me er a demal ngika el redil me a lechub e ng okdemelel. Se el lobo el merek a omengol e tirke el chedebechel el sechal er se el beluu a mo merader er tirka el mengol er a belurir. Se el lebo loradel er tir e te mo omoket a

udoud el chelol el mo er a rukdemelir me a redemerir tirka el mengol. Tia el beketel a udoud a doleker er ngii el kmo Ketkad. A Ketkad a ua debo dongkad a belsed.

Tirka el redil el mo mengol a ulterkokl a chad el loumengol er ngii. Ngika el chad se el lebo lemerek a omengol e ng mo omoket er a udoud el kluk el chelol er ngike el redil me a klsuk el ordemel a mengelngel. A merrreder er se el cheldebechel er tirke el sechal a mo omoket er a klou el Kldait el olsechekill me ng mo mesuk er ngii ngike el rubak er se el beluu el uleltobed er a blolobel.

A remengol a mengol a udoud me a kabekel me a lechub e ng bai el me er a belurir. Tia ikid el omeruul a uchul me kede kmo te mengol.

Tirka el redil a ulterkokl a mengelngir. E ng di lebebil er a taem e ng sebechir el omart er tir e ousechele er a kuk ngodech el chad. Se el lebo el keed a Ketkad e ngike el redil a melekoi el mo er a demal me a lechub e ng okdemelel el kmo kom remuul a tela el mekekere el tet el cherengir tirke el sechelil el sechal. Se el lebo er se el belual ngika el redil e ng mo olab aika el tet el merous er tirke el mle sechelil. E tir a mo omoket a udoud el mo er a demal me a lechub e ng okdemelel ngika el redil. A udoud el lebo longoit tirka el sechal a kluk el chelol me a klsuk me a lechub e ng kldait el ordemel.

Tia el oredem a uchul e ng oredem a lak el melecha aika el udoud el mo ordemir el cherengir tirka el mengol e ng diak lorael tirka el cheldebechel el sechal el uluumengol er tir el di merekmo lebo er ngii a ordemir tirke el redil el mle mengol el rokui e tir a merolung.

Klemat El Mengol. A Klemat el Mengol, ngike el redil el di ngii el ta el mo mengol. Ngika el Klemat el Mengol a lebo lolai er ngii a recheldebechel el sechal. Se el lebo lolai er ngii e te mo melekoi er a demal ngika el redil e melai er ngii. A lekenge a demal a redil e ngike el merreder er se el cheldebechel a meketii a udoud el oltekil e te nguu ngika el redil el mo er se el belurir me ng mengelngir. Ngika el redil a diak a ulterkokl el chad er tirka el cheldebechel a oumengol er ngii. Se el lebo er a belurir e te mo kldibel e mo mengaus a chemachel el omsa ngika el redil e ngii a melilt er a sechal el mo sechelil. Ngike el sechal el lenguu a chemachel er ngii a mo oumengol er ngika el redil. Ngika el sechal a mo omoket a udoud el ordemel se el lebo er ngii a cheleas. A cheleas a ua ia bo dongesiuau er a chad el oureor er a ta er a beluu. Ngika el redil a dirrek el ousechele el di ua rolir a reblolobel el ousechelei. Tia el teletael er a omengol

(Klemat el Mengol) a diak a ketkad er ngii. Ng di se el lebo longeas er ngika el mengol e tirke el cheldebechel el sechal a mo omoket a udoud el ordemel.

Ng ngar er ngii a cheldebechel el mo mengol a kabekel me a bai. Tirka el mengol a diak a ngklir. Te di ousbech er a ngklel se el cheldebechel el lengar er ngii. A cheldebechel el redil a mo kldibel e katekoi e tibir a klalo el lebo longol er ngii. Se el lemetib e te mo er se el beluu el kirir el mengol er ngii el mo melai er se el klalo el letilbir el mo melai er ngii. Aika el klalo a sebechel el bai me a lechub e ng kabekel me a lechub e ng udoud.

Te merael el mo er se el beluu el lebo longol er ngii. A lebo e ngike el merreder er tirka el cheldebechel el redil a mo subedii ngike el merreder er se el beluu el kmo, te mle mengol er a ngera a ngklel el bai er tia el beluu el mo bai er a belurir. A merreder er tia el beluu a mesubed er a rubak er tia el beluu me te mo kldibel, e kasbesubed e mesubed er tirke el cheldebechel el ouklalo er a bai el ble longol er ngii el kmo, te mle mengol er a bimiu me kede nguu el mesterir. Tirka el rubak a subedeterir tirka el redil el mle mengol el kmo a bai a klokliu. Tirka el redil a me er a belurir e a cheldebechel el sechal er a belurir a mo er se el beluu el mo nguu se el bai. A lsekum tirka el redil a mlo mengol er a kabekel e ng di tir el cheldebechel el redil e nguu a kabekel el me er a belulir. A lsekum te mlo mengol er a udoud e te katekoi el kmo kede mo mengol er a techa el rubak er ker el beluu e mong. A lebo e te mo er a merreder me te subedii el kmo te mle mengol er a ta er a rubak er tia el beluu. A merreder a subedii ngike el rubak el leble longol er ngii me nguu se el udoud el leble longol er ngii el mesterir me te nguu el mo reme el mo msa ngike el merreder er a belurir.

Aika el klao el lebe longol tirka el redil a diak el sebeched el mengreos e le dekireos e ng klou el otuub el me er a beluad.

A lsekum a redil a mo chetil el bechiil e ng sebechel el mo olietokl er ngii er a bai. Se el lebo lechetil el bechiil e ng di nguu a til e mo er se el beluu el kirir el mengol er ngii me ng mo tmuu er a bai me ng dengchokl el telkib e tuobed. Elecha e ngii a mocha mungakl el mengol me ng mo merek el bechiil. A uchul e ng olietokl a ua ia durrael er a moded e bo demoietokl er a deliobeche. Tia ngodech er a blolobel e le blolobel a tekoi er a rubak me a letetkii a redil el kmo kau a mo mengol e ng chetil e ngii a di mong. A uchul e se el lebo lemerek el mengol a redil e leme el dirk lesaal ngike el sechal el mle

bechil el di bechil e te lmuut el mo kaubuch. E ng di lechetil e ng di kea lebechiil. Ngike el mo olietokl er ngii er a bai a lesaal a sechal el bechil me ngii a di mo merek a chebechiil e le ngika el redil a mla mo chetil el bechiil.

Chebechiil. A irechar e se el debo debechiil e a demad a mo korir a delobech el ongraol er a demal a redil. Se el lenguu a delobech el ongraol el me e a demad a mo loaia a kluk el orud. A lsekum kede mocha meklou me kede mo ileakl el blai e ngar er ngii a chedal a bechid el meluchel el me er kid e kede ngmai aika el telechull el mo er a demad. e a demad a mo loaia a kldait el bsenged.

Rousechuus. A lebla er ngii a chedal a bechid el ullab a klalo el chedecholl me a lechub e ng bar me a lechub e ng cheriut el me el rousechuus e te di me e a demad a nguu a udoud el msa ngike el chad. A rousechuus a di ua telechull e ng di diak lekall a dolab el mo er a ongismeched.

Belduchel. A belduchel a lsekum a demal a bechid me a lechub e ng ochedal me a lechub e ng okdemelel a mo er ngii a chelsengul e kede mo omelduchel.

Utiichetet. Elecha e a lsekum a demal a bechid a mo er a chelsang e kede mo ometiich er a til. Tia el omeruul a dolab a udoud el mo omsa a demal a bechid.

Saker: A lsekum a chad a tmaut er kid e kid a dirk soad el bechiil e a demad a mo kmer a sekered el udoud er ngike el chad el tilaut er kid me ng smuk a demad e kid a di bechiil.

Tngakireng: A leblo er ngii a meknigir er a delongeled kid me a bechid me lemetord a bechid el mo er a blil, e kede mo melngakl er a rengul Me a debo e kede meketii a udoud el mo er a demal e nguu a bechid el me remei.

Olmesumech: A irechar e se el lebo lechetid el bechiil e ng kired el melmesumech er a bechid. Me a demad a mo meketii a udoud el olmesmechel ngika el redil el ble debechil me ng sukur a demal me a lechub e ng okdemelel e kid a mo merek el bechiil.

Mur: A mur a kot el mla er a bab el omeruul er a chebechiil er a irechar. A lsekum a delad a ulemur er a blil a demal me a lechub e ng okdemelel e kid el ngelekel a klou a klisiched er se el blai. Kid me a bechid a lsekum kede kmal ungil el mangedmokl er a demad me a delad me a ruchedad me a rechedal a demad me a rechedal a delad el rokui, e a demad a mo rullii a merengel a bechid. Se el lebo lemerek a mur e a demad a mo

meketii a klou el kldait el chetul a mur me ng sukur a okdemelel a bechid me a lechub e ng demal a bechid.

Chelebechiil: A chelebechiil a udoud me a lechub e ng klalo el se el lemada bechiil el chad e a rechedal a sechal a ngmai el msa redil. A lsekum kede kaubuch e ng mad a redil e a demad me a rechedal a mo omoket a udoud el dillel a bechid e ng mo medakl. E ng di lsekum me ng mlad a sechal e ng diak a diall. A uriur er a rokui el mechesengul a kodall, el ua sis me a omengades, e ng mo cheldecheduch er a kodall. Me a lebo er ngii a cheldecheduch er a kodall e a demad me a rechedal a mo omoket a udoud el techel a oruikl me a chelebechiil. A lsekum ng sechal a mlad e se el lebo er ngii a cheldecheduch e a demad me a rechedal a mo omoket a udoud el mo techel a otungel me a techel a oruikl me a chelebechiil. A irechar e ng dimlak a ududir a rengalek. A ududir a rengalek a mlo er ngii er se el taem er a Siabal e a techel a oruikl a mlo diak. Me chelecha e se el lebo er ngii a cheldecheduch e ng ngar er ngii a techel otungel (a lsekum a sechal a mlad) me a chelebechiil me a ududir a rengalek. Aika el udoud a bo losuk a demal me a lechub e ng okdemelel a redil.

Omeloik: A irechar e se el lebo er ngii a omeloik el ungil e a rubak me a lechub e a rechad el omes a ngloik. a chemaus a chemachel e olab el oldars er a remeloik me a dirrek a remengitakl el chad.

Omeluked: A omeluked se el detemellii a tellemall me dobals me debo doltobed a udoud el mo meluked er se el tellemall el detilemellii. A irechar e a lsekum e ng mla er ngii a delengerenger el derirellii el tomellii a llach er a beluu, e a rubak er se el beluu a mo kldibel e omals er a demad me a lechub eng okdemeled me ng meluked. Me tia el nguked el udoud a bo losuk er ngii ngike el merreder er a Beluu. Ngar er ngii a ta er a rubak er a beluu el kirel el meluk a nguked. A lsechum a uche er a bo el kldibel a rubak er a beluu e kede nguu a ta er a kekere el udoud el mo msa ngika el rubak e se el lebo loluk a blesed e ng mo telkib el mo beot a ngkeded.

Klechelid: A uche er a leme a rechad er a Ngebard, e a rechad er a Belau a mla er ngii a chederir. Te uluumesingd el ouchelid a charm me a ngikel me a kuk di ngodech el chelid. Aika el chelid a mla er ngii a chelid er a beluu me a chelid er a derta el blai. Aika dirrek el mle kuoll er a rechad. Ng dimlak el sebeched el meknigil el mo er ngii e bo demekngit el mo er ngii e kede mo smecher. A lengar er ngii a chad el mo smecher el

mo chetituokel a secherel e kede mo er ngike el chad el meduch el mengelil me ng mengelil e siekii a uchul a rektel ngika el chad. Se el debo domes er ngika el mengelil e kede msa a mengatorech el ongolet. A lsekum me ng mengelil e metik er a uchul a secherel ngika el chad el kmo ng chelid er ker a olsecher er ngii e kede mo er ngike el meluchel er se el chelid me kede meluluuch er ngii. Kede nguu a udoud el msa el olubet e meluluuch er ngii me ng mo ungil a rengul. Kid a me er a blid me ke rdi mangedmokl er ngike el smecher e omes er ngii el kmo ng mo ungil me a lechub e ng diak. A lebebil e ng suobel e a lebebil e ng mad.

Mekemad: A irechar e ng mla er ngii a mekemad er a delongelel aike el kaucheraro el beluu me se el lemeloched a rael me bo loumekemad er a beluu e lokodir a chad e te nguu a btelul el blebaol. Te nguu el mo er a belurir e nguu el mo er aike el beluu el lekauchad. Se el lebo er se el beluu e te meloik el locha eru el klebesei. A merreder er se el beluu a mo meketii a chelebucheb el ulengetekill e te kuk nguu tia el blebaol el kuk mo er a ta er a beluu el lekauchad. A omeruuul se el loba tia el blebaol el merael a beluu a di kaisisiu. Aika el udoud el lesuk tirka el chad el oba blebaol bo losuk a merreder er se el beluu el mlo oumekemad. Tia a uchul me ng ua ise a lsekum a ta er aika el kauchad el beluu a kuk mo oumekemad e nguu blebaol e leme er a belurir e ngike el merreder a kuk mo omoket a udoud el mo er tir.

A mekemad a ngar er ngii a eru el bedengel. A ta er a bedengel a di oumekemad el diak lolai er a beluu. Tia el rolet a mekemad a di doleker er ngii el kmo mekemad. A onegeru el bedengel a mekemad a mekemad el melai a beluu. Tia ikid el bedengel a mekemad se el lebo er ngii e te blechoel a rechad er se el beluu el lebo loumekemad er ngii el chemiis el mo er a ta er a beluu. A ngklel tia el chiis a dedu el kmo Ngais.

Elecha e se el lechiis el mo er a ta er a beluu, e te mo er se el beluu me te kie el mo meketeket e se el lorolu el mo reme e a merreder er tir a meketii a udoud el bachel el msa ngike el merreder er se el beluu. Tia el udoud a osumech beluu. Ngika el merreder a dirrek el meketii a kekere el udoud el orretel a kebeas e tir a mochu remei. Se el lorael el mo reme e a chedebechel er tia el beluu a obengterir el mo er a belurir me te kaingeseu el kudmeklii a belurir e te lmuut el me remei.

A omesubed er a sisebel a udoud el okiu a siukang a di me er tia e merekong e kid a kuk mo mesuub a sisebel a udoud el okiu a omengereker.

SISEBEL A UDOUD EL OKIU A OMENGEREKER

Omengereker: A irechar e ng mle betok el bedengel a omengereker a mla er ngii. Ng mla er ngii a omelasech el mlai me a blai me a omesarech el toluk me a kuk di ngodech el omeruul el klalo me a kall. A omesubed er a omengereker a mo omuchel er a omelasech. Ng mla er ngii a omelasech el mlai me a blai me a bai me a diangel. Ng dirrek el mla er ngii a omeruul toluk me a orsachel me a ongall me a osongd. A mlai a mla er ngii a eua (4) el bedengel. Ng mla er ngii a kabekel me a kaeb me a kotraol me a brotong.

Aika el bedengel a omelasech me a kuk di ngodech el omeruul el klalo a mla er ngii a udoud er a Belau el kirel el ua lecheral. Me a cheral aika ikid el klalo a mo uldimukl er a omesodel a omerellel aika el klalo el mo obades er a eou. Me a kot e kede mo mesaod er a omelasech el mlai. A mlai a ua aike el bla dedu el kmo ng ngar er ngii a eua (4) bedengel a mlai er a Belau. Ng ngar er ngii a kabekel me a kaeb me a kotraol me a brotong.

Kabekel: A kabekel a meklou el mlai el sebechir a rukede (30) el mo er a rukoua (40) el chad el ngar er ngii. Aika el kabekel a mlai er a mekemad. A irechar e se el lebo loumekemad er a chimo er a beluu e te ousbech aika el kabekel.

Omelsechel a kabekel. A omelsechel a kabekel a kmal mle meringerel a desechel e le ng ousbech er a rebetok el chad el meruul er ngii. A lsekum a merreder er a beluu a omdasu el soal el meruul er a kabekel el mo kabekel el ta er a cheldebechel er a belual e ng mesa ngike el mesisiich el chad el betok a ruchellel me a rengelekel me ng mo melasech er a kabekel. Chelecha e ngike el chad el mo melasech er a kabekel a mo osiik er a ukall el sebechel el mo kabekel. A lsekum me ng metik er ngii e ng di tia el kerrekar a dechor er a chutem er a kebliil me a lechub e ng chetemel a ta er a chad e ng melai er a turk er a merreder er a kebliil me a lechub e ngike el chad el ouklalo er se el kerrekar. Se el lebo lomukel er a kerrekar e ng nguu a udoud el ullemull el msa ngike el chad el ouklalo er a kerrekar e remuul a kall el kelir a rechad er a beluu e tir a mo ngosuir el mekelii se el kerrekar.

Chelecha e tia el kerrekar a kmal klou me ng diak el sebechel el di ua ise e bo loltobed er ngii. Ngika el melasech er a kabekel a lmuut el remuul a kall e a rechad er a

beluu a mo ngosuir el mechelii el mengebekakl er ngii me ng mo sebechel mekurs el me er se el klubed el lebo er ngii e melasech. Se el lebo el merek el omachel er tia el kabekel e ngika el chad a lmuul el remuul a betok el kall e a rebeluu a mo kursii tia el kabekel el me er a klubed.

Chelecha e ngika el chad a mo melasech er tia el kabekel. Me se el lolasech er tia el kabekel e a rechad er se el kebliil me a lechub e te cheldebechel el sechelil a ngelekel me a lechub e ng ochellel a mo olengeseu er ngii el melasech er tia el kabekel. Ngika el chad a remuul a betok el kall el kelir tirka el me olengeseu er ngii. Se el lebo lemerek a omelasech er a kabekel e ng kired el mengsous er ngii. Me se el bo el temel a omengsous er a kabekel e rebeluu a me mengsous er ngii. M ngika el chad a lmuut el remuul a betok el kall e a rechad er a beluu a me ngosuir el kiseksi. Se el lebo el merek a omengsous e te metrakl a rechad e ngii a di ngii ku el merekui er a kabekel.

Chelecha e a lsekum me ng mereko tia el kabekel el mla mo sebeched el ngar er ngii el meius e ngika el chad a mo subedii ngike el rubak el ulemuus er a kabekel. Me a recheldebechel er se el beluu a mo otebedii e nguu el mo er se el beluu el rubak er ngii a ulemuus er a kabekel. A cheral a kabekel a ta el klou el bachel me a chelebuche el mo desechel. Ng ngar er ngii a mekekere el kldait el dedu el kmo ng blekatel. Aika obengkel a char me a desachel. Aika diak lulterkokl a ildisel. Ng di mochu er a rengul ngike el rubak el omechar er a kabekel me ngike el millasech er a kabekel.

A bo domtab er a ureor me a ildisel a kall el tuobed er a omelsechel a kabekel e ng kmal betok. Ise a uchul me a omelsechel a kabekel a kmal meringel. Ng diak a di mechitechut el chad el sebechel el dosechii a kabekel. Se el dolekoi er a chad el kmo ng mesisiich el chad e ng diak dolekoi er a klisechel a bedengel. Kede melekoi er a betok a ruchellel me a rengelekel. A mechitechut el chad a kuk mekesai a ruchellel me a rengelekel. A kabekel a ngar er ngii a ngklel. A omesubed er a kabekel a kuk di me er tia e kid a mo imuul el mo er a kaeb.

Kaeb. A kaeb a kot el bekerurt er a mlai er a Belau. Ng di tirke el ngelekir a rubak me a lechub e te ochellir a lomechar a kebir el omesterir. Aike el diangel er a bek el beluu a kakerous a lekloi er ngii a kaeb er aike el bkul a blai er sel el beluu. A rubak a omuus a kaeb er tirke el meduch el melasech a kaeb.

Ngike el melasech a mo osiik er a kerrekar el kmo ng ukall me a lechub e ng btaches el sebechel el mo kaeb. Ng dirrek el di ngii el mekelii e mechelii el mo kebekakl el mo sebechel mekurs. Se el bla bo el kirel el lotebedall tia el kerrekar e ng mo melekoi er a rebeluu me te mo kaingeseu el kursii el me er se klubed el lebo er ngii e melasech. Ng remuul a betok el kall el kelir a rebeluu e te mo mengurs er a kaeb. Uche er a bo lolasech er a kaeb e ng mo siekii a chad el medenge a telkelel a kaeb el me me ng merreder er ngii e ng melasech er a kaeb. Se el lebo lemerek a omelasech er a kaeb e ng nguu a udoud el msa el omeksullel. Chelecha e ngika el chad a mo subedii ngike el rubak el ulemuus er a kaeb el kmo ng mla mo merek a kaeb. Ngika el rubak a mo omechar er a kaeb me a cheral a cherecheroi el chelebuche me ta el kldait.

Kotraol. A kotraol a dirrek el ua kaeb el omekall el mlai. A omelasech el kotraol a di ua rolet a omelasech el kaeb. Ng siokel a meduch el melasech a kotraol me a dirrek a chad el medenge a telkelel a kotraol. Ngike el medenge a telkael a mo ua ledachelbil tia el urreor. A kotraol el mlai a diak domuus. Ng oteruul. Me a chad a dosechii a kotraol e olterau er ngii. Me a uchul me ng siokel a chad el medenge a telkelel a kotraol a lsekum me ng mo ngodech a teletelel a mlai e ng mo diak el sorir a rechad el omechar er ngii. Kede dirrek el siekii a meduch e ungil el mangedecheduch el chad el mo olterau er a mlai. Me se el lebo er ngike el omechar er a mlai e ng mo sebeched el nguu a klsuk el cheral me a kldait el deseche. A lsekum me ng diak a klsuk er ngika el omechar er a mlai e ng sebechel el nguu a kldait el mtebidii a klsuk el msa ngika el chad el millasech el cheral a mlai.

Brotong. A brotong a ta er a bedengel a mlai er a Belau. Aika di kired el melikes el mlai. Me ng di kired el olab el ngar er a che me a lechub e kede olab el mo er a di kmeed el omerael. Aika diak leua kaeb me a kotraol el dolasech e kede osiik er a chad el me dachelbil. Ng di sebechel a chad el di ngii el dosechii e le ng diak leua kaeb me a kotraol el kmal ulterkokl a telkelel. A cheral a brotong a mentsang me a kldait el desechele merekong.

Omelasech el bai. A irechar e a omelasech el bai a dimlak lurrerel a ta el chad. A lsekum a rubak er a beluu a mo sorir a lebo er ngii a bai er a belurir e te musii tia el bai er a cheldebechel er a chimo er a beluu me te dosechii. Tirka el chedebechel a mo dmak e

dosechii a bai e se el lebo lemerek tia el bai e te nguu el mo er se el beluu el ulemuus er a bai. Te mekedecherur tia el bai e me reme e mengiil er a belsechel a ocheraol.

Se el lebocha el besechel a ocheraol e tirka el cheldebechel a remuul a sese el kall el chelesengel a bai e ngmai el mong. Tirka el rubak er tia el beluu a mo kldibel e omoket a udoud. A lomoket a udoud e a kot el rubak el mo lmuut er a ongeim el rubak a mo omoket a dersechimo el kluk er a Belau. A ongelolem el rubak el mo er a eou a mo omoket a medal a kluk me a lechub e ng klsuk.

Se el lebo er ngii a uus er aika ikid el ocheraol el bai e a ruurrot er aike el blai er se el beluu a mo ometiich a deterir tirke el rubak el mo omechar er a bai.

Omelasech el blai. A irechar e se el domuus a blai e kede mesa ngike el merau e meduch el melasech a blai me kede omuus a blai er ngii. Ngika el merau el chad a leko ng ungil el meruul a blai e le ng medenge renglel a udoud me ng ungil a lolai a cheral a klalo.

A lsekum a merreder er a kebliil a mo soal el omuus er a blai el mo dechor er se el omesolel a blai e ng mo osiik er a chad el mo melasech er ngii. Tirka el melasech a blai er a irechar a di dosechii a blai e mekedecherur e oduii e merekong. A kboub me a ulaol a diak loruul. A kboub a bo loruul tirke el chad er se el kebliil. E a ulaol a di tirke el ngelekel me a ruchellel ngike el rubak a mo omlaol er se el blai.

Chelecha e ng kuk mocha ocheraol er a blai. A irechar e ng dimlak a klou el omeruul el kall er a ocheraol el ua chelechang. Se el lebo el temel a ocheraol e ngike el millasech er a blai a remuul a sese el kall el chelesengel a blai e ngmai el mo er a blil ngike el rubak el ulemuus er a blai e ngmai a cheral a blai. Se el lebo er ngii ocheraol e a ruurrot er se el blai a di mo ometiich er a til ngika el rubak. A kall el lebo longa tirke el mechas a di ike el chelesengel a blai.

A cheral a blai er a irechar a mle kakerous a cheral. A kleua medal el blai a chimo el kluk me a teblo el kldait. A kluk a cheral blai e a chimo er aike el kldait a desechel a blai e a chimo a ongiut e merekong.

OMERUUL EL KLALO ME A OMERUUL EL KALL ME A OMELASECH EL OLEKETOKEL.

Oleketokel. A oleketokel a ta er a klalo el luluusbech er ngii a remechas er a irechar el meleketek a kukau er ngii. A uchul me ng oleketokel kid el meleketek a kukau er ngii. A irechar e se el lebo er ngii klechedaol er a rubak el mo er a chimo er a beluu e tirke el lourrot er aike el blai er se el beluu el mo er ngii a klechedaol a toketek a kukau er aika el oleketokel el olekerd er a klechedaol. Me a dirrek se el lebo el desiil er a klechedaol me te dirrek el toketek aika el oleketokel er a kukau el desiil. Ise a uchul me ng diak el sebechel el mo diak a oleketokel el cherengir a rubak er a beluu.

A oleketokel a diak di lekid el omuus. A recheldebechel el redil a mo katekoi e omuus a oleketokel er tirke el ochederir el cheldebechel el sechal. Tirka el cheldebechel el sechal a mo melasech aika el oleketokel el ulengeasek a meklungel. Ngike el merreder a melasech er se el kot el klou e ulengeasek a meklungel el mo tuobed er a uriul. Se lebo lemerek e tirke el cheldebechel el redil el ulemuus a oleketokel a mo omechar aika el klalo. Me a lebo lomechar e ngike el merreder er tirke el cheldebechel er a redil a mo omechar er se el kot el klou el lullasech er ngii ngike el merreder er a recheldebechel el sechal. Me a ongeru a mo omechar er a ongeru el klou. Me a ongede a mo omechar er a ongedei. Aika ua ise el bedukl a meklungel el mo lmuut er a kot el uriul. A cheral aika el oleketokel a kot el mo er a ongeua a kluk a cheral. E a ongeim el mo er a eou a klsuk me a mentsang a cheral.

Se el lebo er ngii a ocheraol er aika el oleketokel e ng mo meseked a rebeluu el mo omes er se el ocheraol. A rebecherir tirke el redil a omechar aike el kirir a rebecherir. A lsekum a bechil a ta er tirke el redil a mo diak el sebechel el mecherar se el kirel a bechil e ngike el redil a di mo dechor e mesa ta er a rechad el lomdasu e ng ngar er ngii a ududel el ngar er se el kldibel e okerir a ngklel e dmu er ngii me ng mecherar se el kirel. Ngike el chad el mlokedo a ngklel a lsekum ngar er ngii a ududel e ng kirel el mecherar se el oleketokel. Ngika el redil el mlo diak el sebechel a bechil el mecherar a oleketokel er ngii a mo merek el bechiil.

Omelasech el Orsachel me a Ongall. A irechar e ng dimlak a blatong me a rechad er a irechar a millasech a orsachel me a ongall el blatingir. A orsachel a blil a ongraol me a ongall a blil a odoim. Ng kmal diak el sebeched el nguu a odoim el sukur er a orsachel me a diak denguu a ongraol el sukur er a ongall. Tirke el meduch el melasech a orsachel me a ongall a melasech aika el klao e kid a mo omechar. A cheral a tacher el

orsachel a chimo el ongiakl me a ongall me ng ua isei. A blil a ilumel el ralm a meklou el ua teletelel a orsachel e ng di delluchel el sebeched el olab el mo melai a ralm er a omoachel el me er a blai. A ultikllel aika el ollumel a ua aike el meklou el baket. Aika a olechesachel a ngklel. A omelsechel a di ua rofel a a orsachel me a ongall, e ng di cheral a ngodech. A tacher el olechesachel a chimo el klsuk a cheral.

Olekall, Bekai me a Olbidel. A olekall me a bekai me a olbidel a di mle klde el beluu er a Belau a mle sebechir el omeob. Ng di Chelab er a Ngaraard me a Ngetpang me a Oikull er a Irrai. Aika ikid el beluu a ngar er ngii chutem el sebeched el omeob aika el klalo er ngii. Tia el urreor a di kirir a redil. Se el lebo lomeob aika el klalo e tirke el redil a mo er a bai me te bad er se el klebesei e a bo el tutau e tir a mo oltaut er a urrerir. A leko lebad er a blai tir me a rebeherir e a bo lomeob aika el klalo e a leko ng di obeu aike el lomeob el klalo. Tirka el redil a omeob aika el bekai me a olekall me a olbidel e a rechad a mo omechar. Aike el meklou el olekall a kluk a cheral e a mekekerei a klsuk me a mensang a cheral. A bekai, aike el meklou a klsuk a cheral e a mekekere a mengsang a cheral. A olbidel a dirrek el di ua cheral a bekai.

Omelatech el Chai me a Orusech. A chai aike el lolab a remechas el merusech a blsiich. A orusech a lolab a rubak el merusech a chemelir. Aika el klalo a oumesingd el chad er a Ollei er a Ngerchelong a meruul e le ng betok a meklou el kim er tir. Te mo ngmai a ulekgellel aike el meklou el otkang el me me te meu el mo medechel se el okrokr er a btil, e tengmai el mo er a Ngetechur me te melatech. Te di telkib el melatech e kuk mo menguii el omes a teletelel. Ng ngar er ngii a belkul a tekoi er a Belau el kmo “ng ko er a omelatech er a Ruelekl el kedeb a omelatech er kemanget a omenguii.” Se el lebo el merek e te mo olterau. A cheral a chai aike el meklou a klsuk a cheral e merael el me er a eou. A orusech aike el mekemanget a kluk a cheral e merael me me er a eou.

Omelasech el Osongd. A osongd a lolasech a raod el mo osongd. Aika el raod el osongd a diak lsa el ngar er a bab el osongd. A kot el ngar er a bab el osongd a cheluu. A cheral a cheluu el osongd a ongiakl e merael el me er a eou.

Olecholl. A olecholl a chiuesel a omdelel a mesekiu. A mesekiu a kmal meringel a omeliul el ngikel e le ng diak el sebechel el di ta el chad e nguu a mesekiu. A irechar e te cheldebechel el sechal a mo katekoi e mo osiik a mesekiu. Te mo bad er a bai el rokui. Ng ngar er ngii a uuked el lolab el mengesokes a mesekiu. Te kudmokl aike el uuked e

se lebo el klebesei e te mo melikes el osiik a mesekiu. A lsekum te mlo ngeltengat e te mereched el metik a mesekiu e a lak e te kmal mo meketeket el di ngar er a bai e a le klebesei e te osiik a mesekiu. Se el lebetik er a meskiu me lenguu el me e a lsekum te mla er ngii a rebebil er tir el dimlak lebo e di mla er a bai e se el leme e tirke el di mle kie a ngmai a deterir el mo tuchebakl er a daob el belkul a kmo di bo losisiu el bek el chad el di du el mlo dekimes. Tia ikid a rolel a skel a mesekiu el kmal mle chetitukel me a uchul e aika el olecholl a di kirel kltir a ruchellir me a rengelekir a rubak. A cheral aike el kot el ungil a chelebuchebe e merael el me er a eou.

Tenget. A tenget a tengetengel a chaus. Aika tingetel a chusir tirke el ochellir me a rengelekir a rubak. Aika a kot el ngar er a bab el tengetengel a chaus e le ng kmal kesiokel e meringel a omerellel. Kede mengudel aike el btil a meklou el uel el mo betok e sola e mochu meruul. Kede rullii a kerrekar e omsibs aike el cheluib e mengesuch er se el kerrekar e meruul er ngii el mo sebechel tingetel a chaus. A cheral a tenget a oltirakl a meklungel aika el klalo. Aike el meklou a medal e kemanget el tenget a ouchar er a chelebuchebe.

Techull el chelius. A omerellel a chelius a kmal mle meringel. Te ngmai a ulekngall el mo locha er aika el uriur er aika el ngelengelotel el uriur er a omoachel me a lechub e ng mesei. Te ongelt e medechel el mo meketeket me ng mo chedelekelek. Te rullii a bsibs el mo sebechel el omsibs er a klalo el mo chaibibeob e ngar er ngii a besibs er se el belngel. Te mo ngmai aika el ulekngall el me me te omsibs el mo betok e mengesuch er a kerreel el mo klemengetel a techull e mtengetii el mo ungil e mochu olterau er ngii. Me aika el ungil a mo er a chimo el kukau a cheral.

Cheriu. A kot el ngar er a bab el cheriu a ririang. A ririang a di lab el rokir e berrukel er a reng. Te duobech a betok el lab el mo dmilech er a diong el mo mark e te mo nguabek e ngmai el meknngiis er a sils. Se el lebo lemedirt e te tmoched e meruul el mo cheriu. A cheral aika el cheriu a klsuk.

Cheluib. A cheluib a mo toluk. Aike el kot el meklou se el odangeb er ngii el uel a locha ta el sak me a eru el sung. A cheral aika el uel a chelebuchebe. Se el kot el ngar er eou a cheral el uel a mo er ngii a chelebuchebe. A skel a uel er a rechad er a Eouldaob a oumesingd el mengiil a chol er a chelebachebe. A mengiil a chol el tekoi se el dolai aika el uel el me ngmasech el me omechell er a chelechol. Tia el mengiil a chol a ta er a klou

el kerreker er a rechad er a Oreor me a Beliliou. A rechad er a Babeldaob a oumesingd el oumrames me a lechub e te ouberbor. Aike el eru el skel a uel a lolab a uked el mengesokes a uel se el le klebesei.

Laok. A laok a cheluch el uluusbech a rechad er a irechar el mo cheluchul a chesbereber. Aika el cheluch a mengai er a cheritem el kerrekar. Te mo remuu a redechel a cheritem el mo betok el me me te ngmai a budel e kisous. Te smongoes el mo mark e meseos el ngma a cheluchul. Te ngma aika el cheluch el smuk er a omail e mo olterau. A cheral a chimo el omail a ta el ongiakl.

Kukau. A kukau a mla er ngii a eru el bedenel a domechar. Ng mle sebeched el omechar el lluich el kluk el kukau me a lechub e ng teruich el kluk el kukau. A ngklel a lluich el kluk el kukau a chimo el kldeu. A cheral a chimo el kldeu a ongiakl. A cheral a teruich el kluk el kukau a mo er a chimo el kukau.

Kerreel. A kerreel a ta er a kmal mle klou a belkul el klalo er a irechar. Te uluusbech er ngii el meruul a blai me a mlai me a biskang me a kuk di ngodech el klalo. Aika el kerreel a lurrul er a suld er a lius. Te ngmai a ulengchidel er a mengur el mo dmilech er a daob e meche el mo mark. Se el lebo lemark e te ngmidel el mo er a tkul a taoch me a lechub e ng tkul a diong me te melechotech. Te tuchotech e mekngiis er a sils el mo medirt e mochu mengereel. A cheral a dart (100) el reongel a mo er a chimo el kukau.

Ilaot. A ilaot a sebeched el ngmai er a lius me a lechub e ng chelatngikl. E ng di chelatngikl a diak el sebeched el melenges el ua lius. Me a irechar e a rechad a di millenges a lius e dimlak lousbech el melai a ilaot er a chelatngikl. A chelatngikl a blo dengeltengat e kede miltik e a lak e ng dimlak.

Omelenges a dimlak ledi lebek el chad el meduch el melenges. Te di tirke el chad el milsuub a omelenges a meduch el melenges. A lius a diak el rokui el lius a sebeched el melenges el mo ilaot. Tirke el meduch el melenges a di mesa lius e medengeliu a sebechel el mo ilaot me a diak.

Aike el lius el sebechel el mo ilaot a bo lengasech e kmiut a chetebtel e melebel a bngal e melenges e locha ede el klebesei e ng mo er ngii a chemadech e te mochu locha a omail er ngii. Aika el chemadech a lengai el me e melengoes e ng mo ilaot e te omekeek a bekai. Tirke el melenges a oumesingd el tacher el lius a lolenges. A ta el sils e ng ede

el lebo lengasech er a teluo el lius. Ng di tutau me a kebesengei e te melai a chemadech e a sueleb e te di mesubed. A cheral a chimo el diaur el ilaot a mo er a mengsang.

Cheluch. A cheluch a cheluch er a lius. Aika di mle sebechir a rebek el chad el meruul. A omelakel el cheluch a di lekes a lius el mo betok e ngmai el smuk er a orrekodel e ruemech e meche el mo tutau. Se el bo el tutau e a cheluch a mla me er a bebul a ralm me kede cheuisb el locha er a olekall e smongosii el mo mark e ngmai el omekeek a bekai. A cheral a chimo el diaur el cheluch a mengsang.

Dekool. A dekook a dellomel el lullamech a rechad er a irechar. Aika a mle chemachel a llel. A kot el mle meringel a cheral el dekool aike el ulsarech. A ulsarech a betok el llel a dekool e te osarech el mo dmak e mail er a mengchongch. A cheral aike el meklou el ulsarech a klsuk.

Omelngod. A omelngod a mla er ngii a eru el rolel. Ng mla er ngii a omelngod er a resechal me a redil. Tia el omelngod a mla er ngii a belkul. A belkul a olecholt er a klungel a chad. A redil me a resechal se el lebocha el meklou el mocha sebechir el ousechelei e a resechal a medngod a berberel a chimorir e a redil a medngod a cheldngelel a chimorir. A ngklel tia el omelngod er a redil a melecha cheldingel. A redil se el lebocha el sebechir el bechiil e ng medngod a rsel a chimorir el me lmuut er a uchul a chimorir. Tia el omelngod a ngklel a melecha iikr. Se el lebocha lebechiil e bo el ileakl a delengchekkir ngii me a bechil e ngii a medngod a ochil. Tia a ngklel a delebesakl. Tia ikid a ulebengelel a omelngod er a redil. A resechal a di medngod a berberel a chimorir e merekong. A cheral a omelngod er a redil a demal a redil a di oungerachel el mo lmuut er a lemelecha iikr. A delebesak a bechil a redil a oungerachel er a cheral. A cheral a omelngod a melecha a cheldingel a mo er a chimo el kukau. A melecha iikr a ongiakl, e a delbesakl a mengsang.

Reng. A reng a bibrurek el klalo el mengai er a kesol. Te uluusbech a rechad er a irechar el mengilt er a redil se el losurech. Aika a bo lekiis a kesol el me me te kisous e sochesech e mechei el mo kie a rengul. Te ochubel a ralm er ngii e ngmai aike el rengul el locha er a ulekngall e smuk er a olekall. Te smongoes el mo ungil e ngmai el meknngiis er a sils. Se el lebo lemedirt e te otobed er a ulekngall e mail er a ngemengamek e mechei. A cheral aike el meklou el reng a mengsang.

Ngikel. A irechar e ng dimlak a rechad el omechar a ngikel el di odimir. Ng di se el lemur me a lechub e ng di ngera el mechesang e ng ngar er ngii a kerreomel er a ngikel. Aika el ngikel el lullab a rekerreomel el me a dimlak domechar el berraod. Kede ulemechar el chelsuch. Me se el lebo lemerek a mur e a cheral aike el ngikel a kluk me a klsuk el osebeseb.

Omesumech. A omesumech a mle betok el bedengel. Ng ngar er ngii a mesumech er a di beot el telemall el ua chelam a ochil me a lechub e ng chimal me a kuk di ngodech el secher el ousbech a osumech. E ng di chad el rirebet el kmal mlo klou el metemall el kirel a kodall a lsekum a mesumech a sumechii el mekerur el osebelii a klengar er ngii e kede msa ngike el milsumech a klsuk el cheral a omesumech.

Ukeruul. A irechar a lsekum ngar er ngii a chedad el mo smecher el kmal chetituokel a rektel, e kede mo osiik er a meduch el omkar el me me ng omkar er ngii. Ngika el medenge a kar a lsekum ng ulemkar er a chad el osebelii e kede msa chelebuchebe el cheral a ukeruul.

Olabtoachel. A olabtoachel a ngklel ngike el redil el meduch el omechell er a rumechell el redil. A lsekum a ngeleked a mo omechell me kede nguu a ta er tirka el olabtoachel el me me lochellii a ngeleked, e ng kired el msa a omeksullel. A omeksullel ngika el mechas a chimo me a lechub e ng teblo el toluk.

Odesongel. A odesongel a cheldukl el bad el ngar er a ngelo er a blai er a irechar. Aika el odesongel a ua leble el kirel el olekull er a irechar. A blai er a irechar a blirir a remeteet a blechoel el kleim a tuangel er ngii. A ongeru el klou el blai a kleua a tuangel er ngii. A ongedei a kldei a tuangel er ngii. A cheral a odesongel er a kleim a tuangel er ngii el blai a kluk. A kloua tungelel el blai a klsuk. E a klde a tungelel el blai a mengsang a cheral.

Omeluches el iars. A omengusel a iars a mle urrerir a redil. Te mo ngmai a uang er a such el me me te chemiut e mengaus. A uang aike el llel a such el di ngar er a chetebtel e mo merat. A klungel a locha eru el sak me a eim el sung. Te chemaus el mo mekekemanget el mo ungil a meklemengetel e imuil el mechei. Se el lebochu loluches er a iars e te ngmai aika el chelaus el such el odak el mo betok e nguu a kerreel el ruasm el mo klungel se el iars. Te rosmii el odekiar er aike el bambungel a iars. Se el lebo el lemerek e kid a mochu omechar er ngii. A cheral a resel a kaeb a kluk.

**OLECHOLT ER A RENG ER A RECHAD ER A IRECHAR EL KIREL A
UDOUD.**

A rechad er a irechar a kmal mle blak a rengrir er a kedmeklel a udoud. A lsekum a chad a di teblo a ududel e medengeli el kmo ngar er ngii a chelsang el kirel el mo mengoit a udoud er ngii e ng mo blak a rengul el mengereker el osiik er a mo techil a udoud el lebo loltobed er ngii. Se ikid e ngii a mochu sebechel el mengoit er a ta er a ududel. Ng kmal chetirir el choitii a udoud e lak a techil. A udoud a blechoel el ngar er a cheldeng er a blai. A cheldeng er a blai se el tuangel er a uchul a orengodel er a blai. A uchul e kede dmu cheldeng, tia el tuangel er a blai er a irechar a di blechoel el chelsimer. Se el debo er a blai e ng diak debo doku se el uchul a orengodel er a blai.

A irechar e bo lomed a udoud er a ta er a rechad e a lomdasu er ngike el chad el kmo ng mo meoud el mengkad er ngii, e ng nguu se el udoud el mechedeui er a ochil e nguu el msang. A belkul tia a kmo alii kau a mo meksaul a ochik el eko mengeriil er kau. A lsekum a chad a mo kakesemai ngii me a sechelil, e ngike el ta a omasech aike el udoud el siliseb er ngii el okiu a rolel a siukang e ngike el ta e dmu er ngii el kmo, aika a beterturech el udoud me ng diak domasech. Ker di melekoi aike el kerrekernged el udoud me a ildisel a kluk el bla debed er a rechad. A kluk a kmal meringel a domed e le kede meketii a ta er a udoud el ongiakl el mengiakl er ngii e nguu a kluk. A tang, a lsekum kede ngiluu a kluk el diak lsa el ungil el kluk, e se el bo domekmad er ngii e kede osiik er a ungil el kluk el mo omekmad er ngii.

ONGELOLEM EL BLIONGEL

VI

SUOBEL EL CHELDECHEDUCH

SUOBEL EL CHELDECHEDUCH

Aika el cheldechoduch el beldukl er a eou a dirrek el suobel el olecholt a ungil el omeruul me a ungil el klechad er kid a rechad er a Belau. Ng ungil el suobel e mo er a rechad me a rengalek el menguiiu er tia el hong.

CHELDECHEDECHAL A MENGIDABRUTKOOL

Tia el cheldechoduch a mesaod er a uchelel a cheroll er a Belau. A irechar e a rechad er a Belau a ulemotk er a redil e melai er a ngalek. A lebebil e ng suobel a chedil e ng di lebebil e ng mad a redil e ng di ngalek a suobel.

Tia a mlengai er a uldelid el cheldechoduch er a Belau er a rechuodel el kirel a cheroll er a Belau.

A kekedeb el omesodel a kmo: a Mangidabrutkoel a mle charm el ko er a chelid e chad el mla er a meduu er a Ngibtal el mle ta er a uades el beluu er a rechuodel el mla nguemed el beluu. Tia el beluu a mla er a delongelet a Melekeok me a Ngiwal e chelemoll er a elecha el sils. Ng mla er ise el me imuul er a Ngermechau er a Ngiwal er a chetebtel a iedel el uleak se el rekodellel a mangidab. E mo el mo, e ng mo er ngii a delongelet ngii me a Turang el redil er a Ngesechei me ng milsur el mo chad e mo bechil ngika el Turang.

A cheroll er a Belau er a irechar a kmal mle meringel e le buldiil er a redioll a mo uchul a kodellel. Se el bocha el kirel el omechell, e te omotk er a delel el olab a lild el oltobed er a ngalek, me ng oumesingd er a remlechell a mad. Tia el omeruul a klou a klekerngel me a osongel er a rebeluu se el lebo lomotk er a omechell. E ng di Mangidabrutkool er a bocha el bechil a Turang, e te di mle ileakl el teru el ngar er a ulengang, el cherridel a di kmeed er a blai er a Ngesechei. E ngika el Turang a kmal di mle mereched el mo dioll, me ng di mlenga a chelleoch el kall er a blai er a Ngesechei le ng kirel a kodall, e ng di Mangidabrutkool a di liluk e uleba a bechil el mo lmuut er a belsechel a cheroll. Me a bocha el lomechell a bechil e ng bekord melekinga tutau, me ng dimlak a ta el chad el mlo medengeli, e le te dirk chachiuaiu a rechad, e a Mengidabrutkool a ululsisechakl er a bechil er a tekoi er a cheroll e olengeseu er ngii me ng mechellii a tolechoi el sechal me ng di ta el mle klou a lengelel. Me a llengela a

tolechoi er a ulengang, e ng mocha mekdekudem a ngerel a tutau e le ng obunga llomes, me ng ulekerengelterir a remechas el mla er a blai el klekerngel a cheroll, me te kileberruul el tuobed el oldiu me a klou el llangel e kmo, “A ngelek techa ngikang.” me te tobeda a remechas el med a ongeched e oldiu me a rekmeed el obliil me te merema el mla med ongeched, el mle kirir el me oldechelakl er a Mangidabrutkool le ng dimlak lekirel el di ngii el ta el omotk er a bechil.

Me a lebocha er a ulengang, e a Turang a di ngar me a tolechoi me ng di ngar, me tia ngasechereng a ulebult el mo deurreng, me te metir me ng ngloik er a medal a ulengang e ouecharou e kmo: “A chedelekiki, a chedelekiki, a delal a di koiei me a ngalek a di koiei”. Tia a mle uchul a semecheklel a cheroll er a Belau, me ng mlo diak lomotk er a redil a bo lomechell.

MERUK ME A BECHARS

Tia a cheldech duch el mo er a Ngerdobotar el rengedel a Imeliik el cheldech edechal a Bechars me a Meruk. A Ngerdobotar a rengedel a Imeliik el beluu er a mo bedul a diluches er a Imeliik. Tia el beluu er se er a rechuel er a Belau er a kmal irechar er a ledirk lobtois a rechad er ngii, e ng kmal mle ungil beserir e le ng meklou a kedengel e meklou e ungil a cheleched e betok a cheled er ngii. Me a omochelel a klou me a bo el kemtimt me ngii a diak lebo lak a ralm er ngii. Me ng diak a ngodech el debo el metacherbesud er ngii el tekoi. Ng kmal di blotech a rengud a dekie er ngii. Me ng di ureor er a buai er itia el beluu a chelsang el chosengkid e diak a ngodech el urreor el bo demechesa er ngii. Me se el ledubech a ureor el buai e a Bechars el merreder er a Ngerdobotar a melekoi. Ngika el chad a meteet el deruchellel a ngar er ngii e merreder er a Ngerdobotar me ng ktekudel a deruchellel. E kmal diak chomelengmesil er a remechebuul a loked a ureor me a rokui el tekoi er a buai, el di ua lolekoi er a rengelekel er a bliil, me a rechedal a Ngerdobotar a kmal diak a ta el loldeu a rengrir er a rokui el omerellir er a buai er tir. E a Meruk el ongeru el chad er ngii e kmal chebuul a blekeredelel e ngar eou a rengul el meaiu a ngerel. Ngii me a bechil a di osisiu me a blirir a betok a kall me a chemachel me ng chimo el beluu er a Ngerdobotar el oililaol er ngii e omengur e ousueleb e omesoil er ngii er a bek el klebesei e le ngii me a bechil me

a rengelekel a kmal di osisiu er a delengchekkir el kmal bekokuui e bekerurau er a rechad. Me ng di blechoel el ongdibel a blil a Meruk er a rokui el klebesei. Me a lomes e a blil a Bechars a oliangel el diak a remo er a rechad er a buai me a di rechederir kung. Me a ltibir a ureor er a buai me lebong e a Bechars a di ngii el ta el merael el mong. E a Meruk a lorael er a beluu, e te kaokedo el mo tmak er a telkib e merael bechob ruk e mo er a ureor. Me a bo lemerek me lebo rrei, me te mo dmak er a rael el mo er a blil a Meruk. Aike el mlo diak er tir a ledak el mo me te ngmai e mo kairirei. Me te di mle ua ise me a Bechars a kmal di mle ngii el mo merur er a blekerdelel e le chederderel a di merael el mo diak el sebecel e le ngerel a meringel me a medal a chebecheb el diak a ko er a botchereng el delii el kirel a deleuill er a rechad. Me a delengcheklel me ng mlo ongengael er a rechad er a belual a lorael. Me te kie a ta er a klebesei e a Bechars a mocha er a blil a Meruk e oker er ngii el kmo, “Rrach, a Ngerdobotar a obiteklang, me a kulengit er kau me deluut el mo tmak e de kedur a beluu e deluut el sumech a delongeled el mo ungil el mo ua irechar.” E a bo lolekoi a Bechars el mengideb er a beluu e a rechad a bai chemoit a tekingel e oketa mo er a che e diak lebo me ng liluut a Bechars el mo er a Meruk el di mle ngii el oderchelel el mong. Me ng di Meruk ngii el ta a ngilsenges a tekingel e tia el chimo el beluu er a Ngerdobotar a diak a molab a tekingel. Me ng dimlak a mo me ng di mle ngii el mocha medengeli el kmo tia el kngar er ngii el tekoi a locha chetirir a rechad, ngak me a tekingek me a iltetek a di iltetel a blik el diak lebo er a buai. Me ng mocha meluluuch er a Meruk el kmo, “Rrach, ak meskau a ngerachel me ke mo oungerachel er a beluu. Me ke ongeru el chad e ke di moba beluu, me a dui ak telechull er ngii e ng di kau a mo menga dikesel a kot. E ngak a ngmanget el mo menga er a dikesel a ongerung. Me ak mo menga dikesem.” Me ng di mle ngii el Bechars a ngiltii a kelel, e a dial a dimlak. Ng di mla ua ise el tekoi er a rechuodel el me er a chelecha el beluulechad me ng belkul a tekoi el kmo, ke ko er a Berchars er a Ngerdobotar el di mo becheleleu. Me a de meteet e ng diak dedu el kmo ngak a meteet me di lekid el mengull er kid. A de meteet e a medad a mo ungil me a ngered a me er eou me a rechad a kullid.

Tia el cheldechoduch a mesaod er a ungil el merreder me a meknigil el omerreder. A dorreder e ng kired el mo ungil el mo er a rechad el dorreder er tir.

TEB ME A LUK

A Teb me a Luk a ngelekel a Dam me a Dirraibar er a Ngeruchob. Tirka el teru el odam a mla er ngii a teua el ochederir el mle meklou el redil me te bechiil me te ngar er a obliil. Te di mle mekekere tirka el teru el odam e a demerir a mad.

A ta er a klebesei e a Dirraibar a dula er tir, “Rengelekei, kemiu tia el meklunga el chad me ng mla mo kiriu el oldingel e mendedmokl a chelsengrir a rucedemiu. Me ng ungil a chobo mesa a Olengkoi er a Ngerderar me losisecheklemiu er a tekoi er a klechad e a lak e ko mo chebuul.”

Me a lebocha el kukuk e ngika el klou el ngelekel er a Teb a ulemkokl el mekiis e melekoi er a delal, “Ngak e chedei a mochu er a Ngerderar el mo melai a tekoi er a Olengkoi.”

Tia er a lebo er a Ngerderar e ng dirk tutau me a Olengkoi a reboreb er a cheldeng. A irechar e ng mle mekull a dora el melobech er a olbed er a obliil. E a Teb er a lora el mo e ng di milrael dobehii a olbed e merael el mo el lochedii a kul a ulitech e tmuu er a blai. Me a Olengkoi a okere er ngii, “Ng ngera chised e rrang?” Me ng ua sei, “Ngak a mle le ng soak el me mesuub a tekoi er kau. Ng dirrek el soak a chomosisecheklak er a teletelel e ng mo sebechek el ngmai a betok el udoud er a rucedak.”

A Olengkoi a lomes er ngii e ng ko er a diak lultebechel a osengel me ng okere er ngii, “Ng mla ngar er ngii a omelium er a udoud er a rucedam e diak mngai?” Ng kilengei a Teb. Me a Olengkoi a luueta el oker er ngii, “Se er a chomora el me e ng mla er ngii a cheseklked el bambuu e mules.” Ng kilengei a Teb. E dilu ng kmal betok. Me a Olengkoi a dula er ngii, A chomora el ke mo er aike el cheseklked me ke dobehii a telmedeu er ngii me ng chelbedem. Me a chobomrei e lebo er ngii a mechesengul a udoud er kau e ke nguu el mo er a blil a ta er a rechedam e melai a udoud. E a lsekum ng diak lebeskau a udoud e ke nguu ngii el bambuu el cholbedii me ng mo medakt er kau me ng meskau.”

A Teb er tia er a ldu er ngii aika el tekoi e ng kmal mlo ungil a rengul me ng milrael. Ng mle er a ked me ng dobehii a chelbedel el cheseklked e merael el mo remei.

A lebe lrei e ng uluchais er a Luk aika el tekoi el lengilai er a Olengkoi. A Luk a di ulerrenges e ko er a kmal metacherbesul er a rengul. Se el lebo lomtab aika el lolekoi a

obekul e ng ko er a mo metengchokl el tekoi a lebo longelebed er a rucedal a lolai a udoud.

Me tia er a lebo el kukuk e ng di mle tutau e ng mekiis e diak louchais er a obekul er a omerolel e merola el mo er a Ngerderar. Me a lebo er a blil a Olengkoi e ng mlo mo okiu a rsel a orenghodel el mo sibeklii a btil a ulitech e mekokil el mo soiseb er a blai. Me a Olengkoi a di ulemes er ngii e omdesua el kmo ngika a kmal kedung el buik. Me ng okere er ngii, “Ng ngera chised e ochellei me ng dirk tutau e ke dumiang?” Tia ikid e ng dula er ngii, “Ngak e udelei a ngar er ngii a reteua el ochedak el bechiil me te ngar er a obliil. E ngak a di mle kekere e ng mad a demak me ng diak a osisecheklak er a tekingel a klohad me ng soak e udelei a chomosisecheklak me bo kmeduch.

Me a ldela el ua ise e a Olengkoi a okere er ngii, “Ke bechiil?” Me a Luk a kilengei. Me ng liluut el oker, “Ng ngar er ngii a meklechel a bechim?” Me ng kilengei. Me a Olengkoi a luueta el oker er ngii. “Ke meduch el ngar er a chei?” Me a Luk a ua sei, “Ng diak ksal meduch el ngar er a chei. Ak di kmal meduch el mengemang.”

Me a Olengkoi a dula er ngii, “Chelecha e a chobo er a che e ke dmu er a bechim me ng mo er a mesei. E se el chome el ngar er a che e komrullii a chimo el ongraol e nguu el mo msa ngike el kot el klou el ochedam. Me a chomluut el mo er a che e me e ko mo mesa ngike el ongeru el klou el ochedam. E ua ise el mo lmuut er ngike el kot el kekere el ochedam. Se ikid e se el lebo er ngii a mechesengum e a rucedam el rokui a di mo kudmeklii a mechesengum el rokir.”

Me a lebe lrei a Luk e ng mocha oltaut aika el osisecheklel a Olengkoi. Ng milrael el oldingel e omeka er a rucedal er a bek el klebesei.

A ta er a klebesei e ngika el kot el klou el ochedal a Luk a mocha katekoi ngii me a remerrenghel e kmo, “Kede ko er a kmal mechitecheto er aika el omerellel a Luk. Kele lungil a bo loumur a bechil.” Me te kilenge tirka el merrenghel el rokui. Me a lemerema tia el sils el belsechel a merrenghel a bechil a Luk e a rucedal me a rechedal el rokui a mlo kldibel e ulemoket a udoud el kmal mlo betok me ng mlekedoked a belsel.

A Teb a di ulemes er tia el omeruul e ngosecha rengul. Me a Luk a dula er a rucedal me te kodur a merrenghel a bechil a Teb.

Tia er a bocha el merek e ngika el obekul a mlo medenge a omerellel a ochellel, el mle kekere e ua lebocha lorreder er tir. Me se el lebo lomngar e lebe loleiit er a blil a Luk e ng kmo, “Kuietii a idungel e ochellei-okdemang.”

Tia el cheldecheduch a milecheli a omeluchel er a Belau el oltirakl er a ruchedad. Tia el blekeradel a ngar er ngii er a Belau el me lmuut er a chelecha el sils. Tia dirrek el ochotii a uchul e a chad a sebechel el mo er ngii a merengel a bechil. Ng kirel a sechal el oldingel er a ruchedal el bechiil er a ta er a obliil.

TEBANG ME A DEMAL

A irechar e ng mla er ngii a rubak er a Ngiwal el ngklel a Rekesiuall. Ngika el rubak a mlo er a Ngeruikl el beluu el rengedel a Ngchesar. Ng mlo bechil a Merderad el redil er a blai er a Ongeuikl. A Merderad a mlo dioll e mechell er a ngelekir el sechal. Te milengeklii el Tebang.

Ng di mle kekere a Tebang e a delal a mlo smecher el mad. A Rekesiuall a di millemolem el kie er a Ngeruikl e omekeroul er a ngelekel er a Tabang.

A leklunga el chad a Tebang el mocha sebecel el bechiil e ng mlo bechiil. Tia er a lebo lebechiil e tia el chebechielel a mlo rullii el mlo diak lebetik a rengul er a demal. Ng mlo mekngit a omerellel ngii me a bechil el mo er a demal. A Rekesiuall a miltord e mlo reme er a belual er a Ngiwal. A lebo e te mla nguemed a rechedal me a blil a mla mo mechut. Ng mlo kie er a bai. A chelitechetul a uchul e ng mlo diak el sebecel el smiik a kelel, me ng di olengit a kelel er a rechad.

A remekekere el chad er a Ngeruikl a mlo kaingeseu el melasech a mlirir. A ta er a klebesei e a Tebang me a resechelil a mlo er a oreomel el mo omukel er a kerrekar el mo mlil. Uriul er a lenguu a delues me a ilebechel, e te mocha mengurs er ngii el me er a beluu. Te mlengurs er ngii el me er a ked er a Ngerbusechemelal e olengull. Tia el ked a ngar er a bebul a meselech el Ilruul a ngklel.

Tia er a lebo el merek el lolengull e te liliut el mo mengurs er tia el kerrekar. Tia er a lekersii e ng rirebet el me medesum er a chelsel tia el mesei. Te millasem el oltobed er ngii e di dimlak el sebechir el kursii. Te mlo osiik a bek el cheldechuul e diak el sebechir el kursii. Te milechire me ng dellemakl er a mesei.

A Tebang a mocha osiik er a chad el meduch el mengelil. Ngika el chad er a ongelil a mlo ochotii el mo er a Tebang el kmo ng kngtil omerellem el mlo er a demam a uchul me a kerrekerum a di kea el sebecel el tuobed er a mesei. Tia a diak el sebecel tuobed a lak bo mnguu a demam el mei. Tia a belsem e le ke mlo mekngit er a demal.

Tia ikid, e a Tebang a mocha omekall el mo er a Ngiwal. A lebo e a demal a kmal mekngit a chelebulel er a klengerenger. A Tebang a di mlo ngellomel e mocha meluluuch er a demal. Ng uluchais er a demal a teletelel a mlil er a bo loltobed er ngii. Tia ikid e a demal a dula er ngii el kmo, "Tebang, kau a klunga el chad. Ng mla mo

sebechem el di kau. E ngak a mechitecheto me ng diak el soak el mo chosengkau.” A Tebang a dilu er a demal el kmo, “ Chedam ngak a mle cheleuid. Ak meluluuch e olengit me mluut el me me dedak el kiei. Chelecha el mo er a medad e a rokui el ungil me a klungiaol a mo biongel er a delongeled.”

Chelsel a betok el rrak el longebuul a Rekesiuall e ng lueta el mo er a Ngeruikl el mo obengkel a ngelekel kiei. A lebo er a Ngeruikl e te di mlo el omak er a taoch e merael el mo er a mesei el ngar er ngii tia el kerrekar. A Rekesiuall a kmal mle mechitechut e ng di uluutekangel. Ng dilu er a rebek el chad me te orekedii a ongurs e ngii a oked er a ngerel ongurs. Ng mlo dechor e rullii besul e mocha mellach er a Tebang. Ng milellach el kmo, “ A dolekoi er kau e Tebang e kede meked me kolloi, a kerrekar bekiis e ngak a Rekesiuall me ke kmal mo ungil e kerrekar.” Tia ikid e tia el kerrekar a mocha merael diak loumekaduch a longurs er ngii. A Tebang ulemes er a demal e longelang, e le ng kmal mlo dmeu a rengul. A Rekesiuall a uleba ngerel a ongurs me ng rirellii tia el kerrekar el ko er a kmal mo kebekakl. Tirka el mlengurs a kmal di mle mereched el kursii el me er a taoch.

Tia suobel el mo er a rengalek el sechal el kmo, ng kirir a rengalek el mengull e olengesenges er a demerir me a derrir. Ng kirir el mo ungil el mo er a rechad er a blirir.

NGELEKETBUDEL ME A NGELEKETCHELSEL

Tia el cheldecheduch a cheldecheduch er a beluu er a Imul el ngar er a Imeliik el cheldechedechal a Ngeleketbudel me a Ngeleketchelsel. Tirka el chad er a kebliil er a Bartekuu a mlo er a ked el mlo mekdudek, e le se er a irechar e ng dimlak lsa el ngar er a che er a kereker e le te mle medakt a mekekmad. Me te di ngar er a che er a ked. Me te merael er a chelsel a oreomel e a ta er tir a doibechakl er a ta er a rael e melengeta el mo er a Ngeraad. Me ng mesechesoch a medal el omditm a dudek e ngii a lmangel a ngalek me ng dmu el kmo, “A chedil a ngelekek” e mocha merael el kirel ngika el ngalek el ngar er a uchul a kerrekar.

Me a lekeda er ngika el ngalek, e tirka el chelid a kmo, “Mngam a medal ngilechang e ng tmak er kid.” Me te nguam a medal me ng di mlo meterob e ko er a rrau a rengul. E te dmu er ngii el kmo, “Bom debesii a ta er a kaiul a buuch e mnguu el me me mskur a ngelekem e mnguu el mo er a beluu.” Me ng mocha dobesii a kaiul a buuch e mocha nguu ngika el ngalek el loia er a chelsel e nguu el mo er a blil.

Me a lenguu el mo er a blil e ng mlo ng me ng omekeroul er ngii el mo el mo klou ngii me a ngelekel el lulechellii a bechil. Ngika el ngelekel a chelid me ngika el ngelekir el lulechellii a mlo kaukeroul el mo meklou.

Chomorolir el me meklou e ngika el demerir a blechoel el lobeteterir el mo er a chei. A ta er a klebesei e te di kilie tirka el teru el ngalek e ngika el rubak a mlo er a chei. Ngika el rubak a uleknngemedii a ngikel e ng di leme e ng klebesei me a rengalek a mla mo bad me ng dula er a bechil el kmo, “Bo mdul a eru er a ngikel e molekiis er tirka el ngeleked me lomengur.” Me ngika el mechas a mocha ngmilt a teblo er aika el ngikel e dmul me a lemerkang e a bechil a kmo, “Ng di kea molekiis er a rengalek?” Me ng ngika el mechas a kmo, “Msall e kukisii a Ngeleketchelsel me lomengur e bechere a Ngeleketbudel me lemechiuaiu.” E diak lodenge e ngika el Ngeleketbudel a mla mekar me ng orrengees er ngii me ng kmal mlo meknngit a rengul me ngomdesua el kmo ka msall e kbad e kusterir el kmo te melekiis er ngak. E a lechub e ngika el mechas a imiu er ngii e molekiis er ngika el ta er ngii el mechiuaiu, me ng mocha ko er a melechedech er a

chelsel a rengul el kmo, ngak ng techa delak. Me ng di ngar er a rengul el diak lolekoi e okor e dilmuk.

A ta er a klebesei e ng mlo er a che ngii me a resechelil e ng rouar a molech e mertii e nguu el mera blai me ng loa er a ulebengelel a ulaol el bambuu er tia el leblechoel el bad er ngii. E ngii a mocha ousmecher er ngii. Me a bo el kukuk e ng diak lebo loilil e di mechiuaiu. A chomerolel a klebesei el mo e ng di merael tia el molech el mo bediu. E ngii el buik a di bad el ousmecher er ngii. Me a lsa el kmal mengetelakl a bul kung e a demal me a delal a sobeka rengrir el kmo ngika el Ngeleketbudel a kmal socherang. E ng di diak louchais e a redelal el chelid a di ulerrenge e kmo bo bechere e ng ko er a diak losubed er kid. Me a lsa el kmal klunga a bul tia el molech me lemeterakl er a beluu a chisel a secherel ngika el buik e te mocha tirka el delal el mocha oldingel er ngii er a ta er a klebesei. Me ng ngika el delal chelid er a lebo e ng dilu er ngii el kmo, “Ngak tia el mle omes er kau,” ngika el buik a okere er ngii el kmo, “Kau el me omes er ngak ke keskelek?” Me ng dula er ngii el kmo, “Ngak a mera el delam.” Me a ldela el ua ise e ngika el buik a kmal mlo ungil a rengul e dula er ngii el kmo, “Ngak a diak meral smecher me a klukuk e ak nguu tia el molech el mo choitii.”

Me a bocha el tutau e ng ngulemkokl el mekiis el nguu tia el molech el ngar er a ulebengelel a ulaol el nguu el mo choitii e mekiis e le ng diak lesecher. Me a rechad er a blil me a beluu a ko er a kmal mlo mechas a rengrir e le ngika el buik a kmal mesisiich el diak a meringel er ngii.

E te kie ngii me tirka el chad er a blil e diak a louchais el kmo ng mla mo medengellii a mera el delal. Ng kilie el lobengterir me a lsa el klunga e ng dula er a demal er a ta er a klebesei el kmo, “Chedam, ngak a kmal soak el oumlai me mdesechii a mlik.”

A ta er a klebesei e ng ngika el demal a mocha kutmeklii e merael el mo er a ked el mocha melobech er a kerrekar el mo mlil ngika el buik. Me ng dilebechii a kelel a charm e mocha tmaut el loureor er ngii. Me se el tutau e ng mo er a ked e a lekebesengei e ng me remei. Me ng me reme e a lebo er a bo el kukuk e ng mla mengai a bita e le tirka el lobekul ngika el Ngeleketbudel a olengeseu er ngii el omachel er ngii. Me ng ngika rubak a di mo me ng di nguu a telkib e a lebo er a bo el kukuk e ng kuk mla mengai a bitang.

Me te dosechii el mo merek e ng dmu er a demal el kmo, “Chedam, tia el mlai ng ungil a le mengai er a oingerang?” Me ng dmu er ngii el kmo, “Ng ungil a lemengai er a

ikrel eru el klebesei.” Me a bo lolecha a sueleb er tir ngika el mechas e ng oker er a ngelekel el kmo ng tuobed a mlai er a oingerang. Me a Ngeleketbudel a subedii er aika el tekingel a demal. Me ngika el mechas a okere el kmo ngar er ker me ker chobo molengull er ngii. Me a loholt ngika el rubak e ng mocha er a beluu e mo tmaut el ngar er a mesei el mesab a kukau e mocha mengedmokl a kall el kirel tia el sils el lebo el longurs er a mlai. Me tia er a leme tia el belsechel a omengurs e ngika el mechas a mibii aika el kall el mo er aike el lebo lolengull er ngii a rechad. Me a ltaut ongurs e te mengurs er tia el mlai er a chelsel a chereomel el me er a taoch. Me lengar er a melengel a rael e ng suelebang me te olengull e ng medechel a kall me te omengur el bek el chad e kuk lueta el mo mengurs. Me a lluat e lora el te di milrael el mo er tia el kmal moded e ng mo diak lora el e le ng mla moreked. Me te mouengemek tirka el chad el mengurs el kmal di diak. Me tia el chimo beluu er a Imul a di mlo tmurk a ongersir. Me a lsa el kmal di kea cheldechulel e te mocha ko er a kedekedechor el rrau a rengrir. Me ngika el rubak a ko er a di ulureuachel el kmo, “Rungalek, ka me me kuk mongurs.” Me a lebekiis el mo el mo orekedii tia el mlai e kmo, “Chedil, Chedam, ka mochotii er ngak, ngar er ke Ngeleketbudel, Metechesel.” Me a ldu el ua ise e tirka el chad a kaichichiis le tia el mlai a ko er a silebek e obengbangl el mo er a taoch. Me a loltirakl er ngii el mo er a taoch e ng bliou a kall. Me te mo dengchokl e ng mocha er ngii a blengur.

Me a lemerko blengur e ng melmesumech er a demal el kmo, “Ngak a merolung.” Me ngika el demal a momades a ngeltel e ngii di kmo, “Ng diak ak di merael.” Me a lorola e ng millebeakl er tir el kmo, “Kemi se el bo meklou, e kom kmal mo meringel chad, e ng di kom di mo mekerior, e merechorech a rengmiu er a kall.”

Me chelecha e ng ollachitnger e mo er a redil me a rechad el kaubuch e merodel er a rengelekir a resechal el kmo, chomoungalek er a ngelekel a ochedam el mrirdelii e ng kirel bai klou el betik a rengum er ngii er a ngelekem el mla er a delem.

MADACHELBAI ME A UCHULACHETIU

Tia a cheldech duch el mo er a Ngardmau er a beluu er a Ngetbong er a blai er a Merudal. Tia el Merudal a blai el mo tmuu er a kebliil er a Tebelak. Tia el blai a le kilie er ngii a ta el rubak me a ta el mechas el mle kaubuch er a lemekekere el mocha mechuodel, e kmal diak a ta el ngelekir e kmal mechitechetong. Me ngika el rubak a mocha katekoi ngii me a bechil e mocha rodellii a ngelekel ochedal ngika el rubak el sechal el Medachelbai a ngklel me te ulungalek er ngii er a lekekerei. Ng kerrior a mlo er tir me ngika el mechas a mlo smecher el mad. Me ng di mlo ngika el buik me a ngika el rubak a kiei. E ulemngird er ngii el mocha klou me ngika el rubak a mocha olsisechakl er ngii er a tekingel omelenges el doba er a cheldech duch er a Belau er a rechuodel. Ngika el rubak a kmal soal a rengul el msa tekingel omelenges el diak a ulecheueklel e le ng chebedel a kesol er ngii me ngii el rubak oleisech e kmo, “Alii ng diak molekoi a ngodech ke di oltirakl ak dilung. Chobom ngodech e ke metemall.” Me ngika el buik a kmal di uleltirakl aike el osisecheklel okdemelel el mo er ngii me ng olab el tekoi.

Te kie el teru el ongalek el di ungil beserir er a udoud, me omenga er tir me ng kmal di ungil. E a ta er a klebesei e ng merema tekingel a ta el mechas er Ngardmau er a Ngerutoi el mellakl me ng mesobil e oba ngelekel el Uchulachetiu a ngklel. Me a leme e ng dilu el kmo, “Bong e mongiiil a tekingek.” E ngii a kie e mesbeda er a Medachelbai el kmo, “Rungalek aika oderechelel a mechas el me el melekoi a chebechiil, ng mekerang? Ke subedak.” Me a Medachelbai a kmo, “Chedam, ng diak le meknngit. Ngak a soak me di mola nger er a rucedam me te konge e ng di ungil.” Me a le katekoi e ng mlo ungil el ua isei. Me te mocha kaubuch. Me ngika el mechas a nguu a ngelekel er a Uchulachetiu el mo soiseb er a blai el mo bechiil. Ngika el mechas a diak lsa el ungil a rengul, ng telkib el bechechelingaol a rengul el diak lsa el modak.

Me ng kie e melngot el me mekedechor er a nglikllet el kakerous a oruklir. Me a rubak me a ngelekel a mechas er a Uchulachetiu a osisiu a oruklir. E a Medachelbai a lomeka er ngii er a obei me a Medachelbai a medengei e di outekangel e menga er a okuklel e diak louchais er a demal. Te kie e a ta er a klebesei e ng mleliokl a derrir e

mecheuid e ngma obei el smuk er a oruklel a Uchulachetiu el ngelekel e ngmai a ungil el kukau el locha er a oruklel a Medachelbai. A Uchulachetiu a mlilil e merema el kmal songerengerang me ng tmuu el otebedii oruklel me omengur e a bo el chemur e ng obei me ng nguu el subechii er a kboub. E a bo el nguu a teluo me ng dirrek me ng nguu el subechii er a kboub. E a Medachelbai a melad er a olsengel el mo mesubed me ng dechor er a derorem er a blai er bita er a demal e kmo, “Kau bo mchermii, kau bo mchermii, kau bo mchermii a oruklel a Medachelbai.” Me a demal a kmal mo meklou a medal e kmo, “Rungalek, ngera aika el molekoi? Mororem er a oles e ng dimlak kulsisechakl er kau.” Me ng mocha kmeed er a demal e subedii el kmo, “Ngak a di menga obei er a rokui el sils. Me a delak a locha mlecheuid me a uchul me a Uchulachetiu a chetil menga me ng olab el ometech er a kboub. Me a uchul ak melekoi el kmo, “Kau bo mchermii a oruklel a Medachelbai a melekoi el bedul a Uchulachetiu.” Me a Irengesa demal e ng kmal mlo mekngit a rengul er a ngelekel me ng dilu er ngii el kmo, “Rungalek, ke mo ngmai a chidudes el me e mo mesa ongelolem er a ulaol e nguu a blus er a techiir el meketii e ngmai a udoud e smuk a chidudes er a chelsel e meche e di oumechad er kau.” Me ng milruul el mlo ua isei. E te kie el mo meketeket e ngika el rubak a di mle koterekokl a kodellel el mad. Me bocha el kldibel a ruchedal e bo el kakereker e ng kmal diak a medengalii a blil ududir el ongalek. E ngika el mechas a medengalii e diak loleisech er ngii. E di dengchokl er a bebul tia el ulaol el ngar er ngii tia el blil a udoud. E a Medachelbai a kmal lomdasu er a delal el kmo ng meruul el ua ise e le ng kmal diak lodenge el kmo tia el blil a udoud a di mui er a chidudes.

Me te kie e a uriul er a lemeterekla rechad el di mocha ngii el ta e ng mocha nguu tia el blil a udoud. E a bo lenguu e ng di ta el udoud a ngar er ngii e ngii a di chidudes a kluk er a chelsel.

Me tia belkul a tekoi el kmo, kau bo mcheremii a oruklel a Medachelbai, a mlengai er tia el cheldecheduch. Tia ngar er ngii a cheselsel el mo er a rudam el kemangel e ungil el ollachitnger.

CHEDENGAL A MATUKEOLL

A ta el chudela e meiko el rubak me a bechil me a ta el ngelekir el sechal a kilie er a beluu er a Ngetmel. Ngika el mechas a lora el mo er a mesei e ngochotii a omerotel er a chimo el ududir. A ta er a klebese e a ngelekel a ochedal a rubak a mle oldingel er tir, a leme e a okdemelel a dmue er ngii el kmo, bom siik a cheruo er a idungel me me lsebelek. Ng mocha mngar a idungel me me ng chumlui a ngau me a rubak a meseb. A chetui a ngau a mlo er a medal ngii el rubak me ng mlo olechars a iosech er a medal. A lomelechiesiu er ngii e ng mocha sebechel el omes. A mechas a kuk mocha er a mesei me ng kmo, tia kid a udoud el kbertii er tiang. E a lechub e ng ngodechii a le ngar ngii a udoud. Ng chelbel, diak lodengellii a rubak el kmo ng mla mo diak lemeuiko.

Mlo chuib a tela el klebesei e ngika el buik a kuk lueta el mo oldingel er a okdemelel me a bechil. A le bocha e ng ngouchisa er ngii er a chetui a ngau el mla remuul a medal el mo omes. Me ng lueta el mo omngar a bebil er a osisiu el idungel me oiit er a blai. Me a rubak a kmo, "bo mesa odimek el chedengal a rrull me mkeldii e me me domengur" e morolung. Me ngika el buik a mlo mkisii a olekang e kmo, "Tia ia klongosem? Me ngika el rubak a kmo choi. Me ngika el buik a kiderii tia el klengoes el mo er a medal ngii el rubak me ng kilebiekl ngika el rubak e kmo, "Aika a chedengal a matukeoll." A matukeoll a delasech el diak lekall me a chedengal me ng diak el kall.

A rubak a dula el kmo, tia klteketel el di longebled er ngak, e omeka er ngak er a diak el kall! E dula er a ochellel el kmo mnguu a blil a udoud el ngar er a uchul a ngemokel chab el me me kulekoi. A bo lenguu el me e ngika el rubak a ngila udoud er a cheslel el ngmai el msa a ochellel e dmue er ngii el kmo morael e diak mluut el me el di merekmo chomrenges el kmo ak mede e ke me me ke doklak. A ngelekek me a delal a diak ludesuall. Me ngika el buik a ngmai aika el udoud e merael. E a mechas a merema el ngar er a mesei. Ng di mle el mo omes er a blil a udoud e ng bechachau, me oker el kmo a ng techa a mle er a blai? Me a rubak a kmo, ng diak kudengei. A mechas a kmo a udoud a dibus. Me a rubak a kmo, "Aika chedengal a matukeoll." Ng olecholt er a omengeblad er ngii me a ngelekel lomsa chedengal a matukeoll e kmo ng chedengall a rrull. Me a lemede ngika el rubak me leme ngika el ochellel te ouchais er ngii.

A suobel a kmo a lemekngit a omerelled el mo er a rechad e kede blechoel el mo metik a diak lungil tekoi el me er kid. Ng kired el mo ungil a omerelled el diak dongeblad a omeruul.

RUEBET ERA OKEDIUL

Tia a tekoi el mlengai er a cheldech duch er a Kiok. A Kiok me a Reaos a beluu er a Ollei. A Ngirmelenges a mle chad er a omelenges e le ng siluub a omelenges er a Tellames. Se el lebo lolenges e ng chemars a ilotel me ng mekeek a betok el oltall. A Ngirmelenges el chad a ko er a sersuul a uldesuel e teleuadel a rengul el chad, me ng ua el teblo a blil el mo bedul a kldei. Me ng melenges, e a lebebil e ng mo er a ta er a blai me te oitel a omilel e metir a oltall, e ngii a kuk mo melenges el mo er a tang. Me ng millenges el mediderurt er a delonge lel aika el blai el ngar er a Reaos me a Kiok el mo e me el diak luterkokl a blekerdelel. A Ngirmelenges el chad a mle meses el oureor el ua ise, me te mocha kausisbech aika el blai me se el lebo el dum er a ta er a blai el songerenger, me lechelechaet a delel e te kmo, me bo mngai omilel ngika el rubak, me te mo ngmai e di lmuk er ngii er a ro lel a blengur e le te ousbech el kmo, ng mla omengur er se el ta er a blai me ng medinges. Me ng me tmuu me ng di reboreb e di kea el sodii e a le mla er ngii omerusel a kebui me a buuch e ng mla metom. Me ng reboreb e omdasu el kmo bechere e kbo er se el ta er a blai e a lta e a kumengur. Se el letobed el mo melenges e a le kelekel el me er a Kiok e te kmo ng locha mle meketeket el ngar er a Reaos me a lta e ng mla omengur. Tia ikid e ng di mle ua ise e kmal mlo metacherbesul er a klengerenger e le ng di killekel er a delonge lel aika el blai. Se ikid a mle teletelel omelenges er ngii el chad. Me a bocha le ua ise a blekerdelel e ng di mle chellungel a omilel e mngai el me obiou el ruebet er a did er a Kiok e le ng mede er a kall. E le te mlo kausisbech el ua ise el kmo a lta e ng ulemengur er se el ta er a blai me a ta er a blai me ng ousbech el ua isei. Me ng mlo belkul a tekoi el kmo, Ng kired el oterkokl a uldesued me a rengud me ng diak derebet er a okediul el ua Ngirmelenges.

Ng kired el mo ultekokl a uldesued. A lak lultekokl a uldesued e kede mo metik a chelebuled.

MECHUTEDIL

A belkul a tekoi el “Mechutedil” a mlengai er a cheldechoduch er a Ngebuked er a Ngaraard. A Ngirchedelchil me a ochedal er a Mechutedil a kmal di teru el ochad el kiliei er a Ngebuked. Ngika el ochedal a mlo bechiil el mle telkib el cheroid a delengcheklel er a chysel a beluu er a Ngebuked. Ng mlo bechil a chad er a omengereel el suld e olterau, e ngii a ko er a mengkekedmokl a udoud. A Mechutedil a diak lsa el klebokel el dil, me ngika el ochedal a dimlak lsa el betik a rengul er ngii. E dirrek el ulemdasu el kmo ngika el Mechutedil a chelsengsang a bechil el di omad a suld e di melechotech a chau, e ngera ng rullii.

A Ngirechedelchil a kuk melenges a me ng melikik er a ilaot e olab el omeka a obliil, e diak letkii ngika el ochedal. Ngika el ochedal me a bechil a ko er a di mengebuul, e ng di kmal ko er a meduch a rengul el redil me ng mendedmokl a ududir. A ta er a klebesei e ng mla er ngii a seked el mocha subechii er a cheldebechel er a Ngebuked el ngar er ngii a Ngirechedelechil. E tia omengkad el me er a beluu er a Oreor. Me a bocha el kirel a belsechel e a Ngirechedelchil a dirkak lebetik er a mo bleketelel el udoud. A omerael a metengela el me er a Klebeang e ngii a dirk ua berius er a chysel a beluu, el ua el tilak er a mekeald el kolekel el mo er a telia el beluu el mo er a telia el omed a udoud, e le ng dirkak lebetik er a mo bleketelel me a omerael a di ua ngera el mocha orrechad er ngii. A ochedal er a rengesa el ua ise el kmo, ng di meklenga er a chysel a beluu e ng mocha kudmeklii e ngmai a sese el kerrekerengir e merola el mo er a Klebeang. A lebo e ng mocha ulecheuekl er tia el teluo el tang er a diangel er a mo bedul a beluu e ko er a melebedebek el kmo a ochedak a merur er ngak, me a bo kcholt er ngii er a seked e kelel sebek a telil.

A Ngirechedelchil a ko er a di ileakl ku er a rechad el di mengeanged a medal e telecholb er a klsib. E a Mechutedil a berrotel er tia el tang el omai er a rengul el omekedo er a ochedal. E a ocheda a ko er a mlo ileakl e chilsngekl me a Mechutedil a omekedo er ngii me ng merola el mong. A lebo e ng okere er ngii el kmo, “Ng mla mo ungil besum?” E ngii a kmo, “Ng dirkak.” E ko er a deuall a medal. Me a Mechutedil a dula el kmo “Aika kid a udoud, e ngak a di kikiong el redil el ochedam.” Me a ldela el ua ise, e a Ngirechedelchil a kmal kildesii a telil e di mle mikoik el lilangel er a deuil a rengul, e mesbedang a rengul er a omerellel. Me a ‘mechut e dil’ a mlo belkul a tekoi.

Me a belkul a tekoi el mengai er tia el cheldechaduch a kmo, ng diak douketui er a mengelengalek el ochedad me a rechedad.

TEBRUCHEL

Tia el Ngerkeam el beluu a rengedel a Ngermetong el beluu el mo er a Ngerchelong el lekilie er ngii a ta el rubak me a ta el mechas el mle kaubuch e mechellii a ngelekir el ta el sechal me te mengeklii el Tebruchel. Te kmal mle ungil mendedmokl er ngii er a lekekere el mocha klou el chad. Me ng kmal mle ungil beserir. E a Tebruchel er a lebocha leklou el chad el mocha medengellii a rengul e ng mocha bechiil er a ta er a beluu er a ta er a blai. A lebo e te kmal mlo ungil er ngii er a rokui el omeruul el mo er ngii. Me ng di ulebult el mo chemau a bechil, e mechudo er a demal me a delal, el rengul tia el lengar er ngii a ungil el tekoi. Me ng melemolem er a rengul e obeso er a mo oldingel er a demal me a delal.

E tir a kmal mechitecheto me ng kmal mekngit a chebulir er a delengchokl. Me a blirir a chemersang me te melabek er ngii er a keai. E di oliiu a durech e diak a idengeligir me te di olsiu a ulaol er a teliang, e tir a di kie er a telengodech el ulaol e a telia a mla mongkangk me kmal mekngit a chebulir.

E ngii a kie e a bechil a dillang me ng kmal kosenga rengul er a bechil me ng kmal di kea el letkii a mo reme er a blil a demal me a delal. E a ta er a klebesei e a bechil a kmal mesengsengchang e kmal klou a che, e chederrriich me ng tilobed el mo er a chei. E kmal ngilemedii a ngikel. Me ng dibus e ngii a mechell a bechil el sechal a ngelekel, me te chobtii e a bechil a mo er a chebill. Me a lemerema el mla er a che e a delal a bechil a kmo, “Bo mriso a bedengem e me mesa ngelekem e ng mlechell el sechal. Me ng mlo melecho e a leme e bo el nguu a ngelekel el me e ng kmal di ulemes er ngii e longelang. E dimlak lolekoi e lmuut el nguu a chelasel el tuobed e mocha reme er a blil a demal me a delal. Me a lebo e ng kmal mlo mekngit a rengul er a lesa chebulir me ng kmal meluluuch er a delal me a demal e mocha mendedmokl er tir el mlo er a ulebongel er a kodellir. Me ngika el Tebruchel a ngiluu a llechul a rengul er a lesa ngelekel er a lemechell el kekerei.

BELKUL A TEKOI

RENG ME A ODAB: Aki ngar a mur e mera el betok a bedengel a kall me ngak a songerenger e ngemokel me ak mekekii a blatingek. A kumengrong e ak di kila dersesei e mera el medngesa e a blatingek a dirrek el dirk obibriid a kall er ngii. Me a kdula el kmo, "**a rengud me a odab, a renguk ak di kma el rokui, My eys are *biger than my stomach (Eng)***"

A belkul tia el okesiu a olecholt er a klekakerous er a kllungel a odab me a nglemokel er a reng el obengkel a ues. Ak mes a betok el kall me a renguk a obes er a kllungel a odebuk el kmo, ng kuk di kekere a delek el diak lsiseb a rokui el soal a medak me a renguk er ngii.

KID E REKLANG A KELE KEDE NGALEK TANG: A le mengai a beluu er a Ngeremeskang e te mlo kie er a Ngeburech er a Melekeok. E a Rechimelekeok a oleker er tir te sibai. A resechal a mo er a chei el me merous a ngikel me a cheled er a rechedal a Melekeok. A redil a ngar a mesei el melngot omechur a blil a Melekeok. A renglai er a mekemad el redil a blil a telingolir a remlo mesisiich er a mekemad. Te chilarm er a meringel el ker e dimlak a cheldechulel er tir.

A ta er a klebesei me le kldibel a klobak, e a bitacheritel el ekebil (5-6 a rekil) soiseb el mo kie er a medal a Reklai e mengedecheduch. Te mo olekebai er ngii e a Reklai a kmo, bechere e ng locha ngar ngii a tekingel. Ekebil a kmo, Reklai aki merruu a riamel ngak me a delak e ak rouar a chimo el betok a mekekere el kliok er ngii, me a kuker er a delak el kmo, te rua techa a mlenga er tiang? A delak a kmo, te mlenga er ngii a rengalekukeruu. A kuk rouar a_chimo el di chimo kliok er ngii e ng di kmal klou el kliok. Ng techa mlenga er tiang? E a delak a kmo, te mlenga er ngii a rengalektang. Ngii el ekebil a melemolem el kmo, me kid e Reklang a kele kede ngalektang!

A le mereko el melekoi e a Reklai a kmo, le medebusech a debusech, e mkidebii a beluu er a Melekeok. A le merema le mekideb a rechad e ng kmo, ko mo er a mesei er a klukuk, me a resechal a mo er a chei. Ng mekedmokl a kelir a rechedad e le te mo mengader er a Ngeremeskang. Ng mlo budech a delongelir tir me a Rechimelekeok e mlo remei er a Ngeremesakang.

KO ER A REKEL A BOBAI: A oumesingd el tekoi a di **“ko er a rekel a bobai el di me tobed er a ikrel.”** Ngera belkul tia el okesiu? A belkul tia a kmo, oumesingd er a tekoi el meruul a di me chemolt er a ikrel. A kedung a di lmuk e di meruul a loruul e di mo chemolt me a rechad a mes e melekoi a ungil el omerellel. A merechorech a omart er ngii e mengubs e ng di mo chemolt me a rechad a mo medengei. A melemalt e ungil a rengul a me tuobed er a medal el klidmechur me ng ochau a reng me a ues. A chebirukel a rengul a omekebek er ngii el melekoi a ungil, e ng di a meknigil el uldesuel a di me tuobed er a medal me a ngerel me ng moues er a rechad. Ng mera el di ua **“bobai a lebo lmarek e ng me tuobed a rekel er a budel.”**

KELEL A BEACHEDARSAI: A Beachedarsai a chilteklai a sechelil el mo er a blil. A le bocha e te kmal mede er a klengerenger er a klemengetel a omerael. Me a bechil a Beachedarsai a mocha remuul a kelir el telbached el kukau me a telbodech el ngikel. A Ngika el sechelil a di miles e omdesua el kmo, ak mede er a klengerenger e menga aika e mo medinges?

A lomengrong e lenguu a kukau el me er a ngerel ng ngar ngii a ngar a blatingel. Ng mo medechii a ngikel e ngii a dirrek a kllungel. A le medngesa me le mereko e ng mla er ngii a derengir.

A kedelaol el kall a di sesei e diak lemokngemed el ko er a "kelel a Beachedrsai el di telkib e diak lemerekui."

KO ER A BELOCHEL: **"Ko er a belochel el mesengei a otelochel e mo suebek."** A belochel a reboreb el mengerrui er a ungiat a eanged, e a lsesengii a eolt me a chull el rebetu e ng suebek.

Tia belkul a kmo mongeroid er kau er a kdekudel. A le meses a eolt e le meringel a daob lak obo er a chei me a lechub e momekall el mo er a ta er a beluu. A ltae ke meduch er a bekall e ng di omomdasu e ke mesisiich er a ngar er a bab el klisichel a daob?

BESOSERCHEMAI: Ng mera el mesisiich el chad el ko er a **" besosercemai el di berrotel e melitech"** el ochit a kebel a Belau. Ng diak lolekoi a betok e mesisiich el tekoi. Ng di lmuk e blak a rengul el otobed a klisichel el mius. Tia a dirrek el melekoi el

kirir a rechad el dmu kesai e remuul el mo ungil. Ng diak loked el miou a kmal betok e le kesai a meruul.

KO ER A RENGUL A BOLOBEL: Ng kuk ta er a ungil el blekeradel a chad el **"Ko er a rengul a bolobel el di melemalt."** Ngika el chad a lsoal e ng ourreor e a le mesaik e ng diak loutekangel er a rengul, ng mo lodesii e mechiuaiu. Ng diak lomdasu a uldesuir a rechad el kirel. Ng kuk di melemolem el meruul a soal. Ng sebechel el kuk di ngodech er a rechad. Ng ua ia bolobel el kuk di ngodech er a bek el ngikel el kekemanget e melemalt a delechil.

CHAR ER A KOSIIL: A Merreder a kmo, "mrellii tia, becherei e mrellii sei", e lmuut el kmo "mrellii tiang, becherei e mruul aikei." A merredered a ko er a **"char er a Kosiil, a lecheraches e ng mei e a lekeriik e ng mong"**.

Tia el okesiu a melkoi er a berekarek el chad. Ng diak lutebechelii a ta el urreor el rokir. Ng mechelii a ta e mechere e mo er a ta e kuk mechere e mo imuul er a tang. Ng mera el diak debo dechad er ngii. A urreor a di teleteu el rokui e kebesengei.

ELBESOI ER A NGRIL: A Elbesoi er a Ngril a mlo er a chei. Ng mlo er a chebingel el diak lechebngel. Ng chebngel a ngodech el chad. E ngika el chad el ouchebingel er ngii a dibus. E a mekamad el osiik er a ouchebingel a tmoech e a lebo e a Elebesoi a ngar er ngii me te nguu a bdelul el remiid.

Me ng belkul a tekoi el kmo, **"lak mko er a Elebesoi er a Ngril el mad era diak lechebngel."** E mera el tekoi. Chomko ng dimlak le bo er a diak lekllok le me lolai a ngikel er ngii e ng dimlak lemad. Tia a mellach er kid el kmo bom cheroid er a diak leklloklem. Alii ke mo el mudechem er a ta er a rechad!

ODERUCHELCHIISNGAI. Ng ko er a kmal meoud el me mekideb a rechad! Ochoi, e le oderuchel a ko er a **"oderuchelchiisngai."** A merreder a oderechii a chad, e ngii a meltii el oderechii a kuk tang. E ngii a kuk oderechii a ta, e mengesuch a oderuchel el mo tuo er a uriul. E mekera e mo mereched a cheldechuduch?

Tia a betok a rengalek. A mechas a oderechii a ta el mo merar er a klengoes, e ngii a meltii el oderechii a ochedal. Ochedal meltii el oderechii a ochellel, e ngii a kuk meltii el oderechii a tang. Te nguu ker? Te locha di kaiuedurech e a klengosir a mo bekebau.